

## PRAEFATIO

R1 v.1 Orpheum vatem renarrant ut priorum litterae  
 2 cantitasse dulce carmen voce, nervo, pectine,  
 3 inter ornos, propter amnes adque montes algidos,  
 4 (quem benignus grex secutus cum cruenta bestia  
 5 audiens melos stupebat concinente pollice :  
 6 tunc feras reliquit ira, tunc pavor jumenta, tunc  
 7 lenta tigris, cervus audax, mitis ursus adfuit.  
 8 Non lupum timebat agna, non leonem caprea,  
 9 non lepus jam praeda saevo tunc molosso jugiter.  
 10 Artifex natura rerum quis negat concordiam,  
 11 hos chelys musea totos Orpheusque miscuit) :  
 12 sancte pater, o magister, taliter canendus es,  
 13 qui fugatas Africanas reddis urbi litteras,  
 14 barbaris qui Romulidas jungis auditorio,  
 15 cujus ordines profecto semper obstupescimus,  
 16 quos capit dulcedo vestri, doctor, oris maxima.  
 17 Nostra vota te precamur ut secundes, optime,  
 18 ante cuncta non recusans illud ipse pendere  
 19 non tuas qui rite laudes, mente sed qua concinam  
 20 nos licet nihil valemus, mos tamen gerendus est.  
 21 Ergo deprecantis, oro, cinge lauro tempora.

## HYLAS

R2 v.1 Fata canam pueri Nympharum versa calore  
 2 in melius : sic Musa mones. Quis casus ademit  
 3 Alcidi comitem, solamen dulce malorum ?  
 4 Fuderat Idalius gremio se forte parentis  
 5 pinniger et collum violentis cinxerat ulnis  
 6 oscula pura rogans. Mater devota coruscans  
 7 indulget vultus roseoque est orsa labello :  
 8 "O mundi domitor, caeli quoque, flamma Tonantis,  
 9 numen posco tuum cujus sub jure vapore,  
 10 per tua tela, puer, fecundis illita flammis,  
 11 ut des effectum votis de more parentis.  
 12 Nil rude, nate, precor nec supplex improba posco,  
 13 ardua non jubeo, quamvis magis ardua vincas ".  
 14 Ille refert matris disrumpens verba precantis :  
 15 " Magna jube, non ausa prius, sublimia manda,  
 16 o genetrix. Quo tela vocas aut quid petis uri,  
 17 quem divum modo forte jubes hominum calere ?  
 18 Exprime : flammetur. Quid fletu lumina tinguis ?  
 19 Audeo, si cupias ipsum flammare Tonantem  
 20 et dominum caeli facie vestire juveni  
 21 oblitumque poli rursus mugire per herbas  
 22 confessum per prata bovem : cadat aureus imber,  
 23 divitias ut tecta pluant ; sit fulminis ales  
 24 ipse sui, satyrus, cycnus, Latonia, serpens ;  
 25 Alcmenam galeatus amet : mucrone coruscet  
 26 et clipeo rutilante tonet, dum miles adulter

27 conjungat noctes subtracta luce dierum.  
 28 Si Pallas placeat, nostros jam sentiet ignes  
 29 virgo ferox sexu : fugiet viresque fatetur  
 30 ut solos tractet, rejecta cuspide, lanas.  
 31 Noster si reus est auctor Neptunus, anhelans  
 32 aestuet inter aquas, telo flammante per undas :  
 33 igne meo vincentur aquae : fumantibus undis  
 34 Tritones Galatea, Thetin delphines amabunt :  
 35 quicquid fluctus habet, totum succendo pharetris.  
 36 Sive parens, optas homines his ignibus ustos  
 37 illicitos violare toros, ut non pia patris  
 38 oscula nata petat nec natus matris amator  
 39 dulce nefas cupiat, frater vitietque sororem  
 40 privignoque suo potiatur blanda noverca :  
 41 alter erit Perdicca furens atque altera Myrrha,  
 42 Juppiter alter erit terris de fratre maritus :  
 43 parva loquor : tauro, si jusseris, altera regis  
 44 flammetur conjux, reddetur et altera Phaedra ".  
 45 At his laeta Venus vultu mutata renarrat :  
 46 " Impubes lascive, puer cui subjacet omne  
 47 quod natura creat, caelum, mare, sidera, tellus,  
 48 nemo notet Venerem, quod supplex mater Amorum  
 49 ignis opem de prole rogat, nam munere in isto  
 50 quamvis sit communis honor, tamen, alme, fatemur  
 51 hic numen plus posse tuum. Lamenta parentis  
 52 si placet ulcisci, paucis (advertite) docebo.  
 53 Nympharum, puer alme, chorus dum pensa revolvit  
 54 Penei sub fonte sui (pudet ore referre),  
 55 Solis amata canit Clymene mea crimina Nymphis  
 56 meque suo prensam Nymphas monet indice Sole,  
 57 Vulcanique sonat captivo Marte catenas.  
 58 Quas audire libet de nostra clade canentem.  
 59 Sed si de nobis certe cantare placebat,  
 60 iudicium Paridis vel nostros, nate, triumphos  
 61 cantarent fluidae carpentes pensa puellae.  
 62 Est gemitus haec causa mei. Quas ure sagittis,  
 63 corda vel illarum dulci continge veneno :  
 64 noscant quid sit amor, discant tua tela vereri.  
 65 Alcidis comes est comis puerilibus annis,  
 66 quem rubor ut roseus sic candor lacteus ornat ;  
 67 illi purpureus niveo natat ignis in ore.  
 68 Hoc puero viso Nympharum turba calescat ;  
 69 haec illis sit poena nocens, ut vota trahantur  
 70 ipsarum in longum, donec pubescat amatus ".  
 71 Iret adhuc in verba dolor, ni penniger audax  
 72 dimittens matrem fricuisset cote sagittas.  
 73 Arcu cinctus erat, dantur post terga pharetrae,  
 74 accipit et flammam hominum divumque voluptas.  
 75 Evolat armatus. Vix caelum liquerat ales  
 76 jamque tenet terras : sic currit mentis acumen.  
 77 Ut venit ad fontem, lapidem projecit in undas.  
 78 Concussit vitreo sonitus sub fonte puellas :  
 79 exiliunt cunctae, quaerunt quae causa quietas  
 80 sollicitet. Volucer fugiens nemus intrat opacum  
 81 moxque dei vultus vestivit imago Naidis :  
 82 tendit membra puer, longos ut crescat in artus,  
 83 ut possit complere dolos ac jussa parentis :  
 84 usque pedes fluitans vestis laxatur ad imos,

85 candida diffusi ludunt per colla capilli  
86 et vento crispante gradu coma fluctuat acta,  
87 frons nudata decet diviso fulgida crine ;  
88 et velut invitos gressus pudibunda movebat  
89 incedens fluxoque latent sub tegmine pinnae.  
90 Misceturque puer Nymphis sub fronte puellae  
91 et causas perquirat Amor, cur fonte relicto  
92 terras cauta petit ; facilis cui turba fluenti  
93 rem pandit ; perjurat Amor, quasi nescius esset.  
94 Interea post bella suis Tirynthius ibat  
95 victor ovans, cui junctus Hylas pulcherrimus haeret  
96 gestans fulminei pellem cum dentibus apri ;  
97 et licet invalidus haec pondera ferre laborat,  
98 ipse tamen gaudet, quasi jam commune triumphum  
99 gestet et Alcides non solus fuderit aprum.  
100 Horrent Alciden Nymphae mirantur Hylanque.  
101 Ex quibus una tamen cunctas affata sorores  
102 haec ait : "O faciles Penei numina Nymphae,  
103 dicite, quando parem puero natura dedisset.  
104 Non fuit Hippolytus talis, non pastor ab Ida,  
105 nocturnae fulgore deae non pulcher Iason ;  
106 nec Bromius jam talis erat nec magnus Apollo.  
107 Felix sorte sua, cui talis semper imago  
108 serviet et roseis recubans dabit oscula labris ".  
109 Cum nimium laudatur Hylas, se subtrahit ales  
110 et profert arcum ; permiscens mella venenis  
111 armat tela dolis et spargit spicula Nymphis :  
112 pallescunt omnes, subitus rubor inficit ora,  
113 tendunt membra simul, cunctis respirat hiatus  
114 oris et ad crines digiti mittuntur amantum,  
115 incipiunt fari mediaque in voce resistunt ;  
116 tot signis vulgatur amor. Clymeneque sorores  
117 alloquitur : " Placet almus Hylas rapiatur in undas,  
118 ut sit noster amor. Nec erit mihi crimen amanti :  
119 Oenone Paridem, Lycastum zelat Amazon,  
120 pulcher amator Adon, Furias amat ipse Cupido ;  
121 quod caelum, quod terra, fretum, quod sidera, Pluton  
122 exercent per saecula diu, cur Nympha veretur ? "  
123 Cum loquitur, cantabat Hylas fontemque petebat  
124 hauriturus aquas. Urnam licet ipse tenebat,  
125 ut puer est visus, faciles risere puellae  
126 et lentum venisse putant. Placet omnibus idem,  
127 vix urnam summisit aquis dextramque tetendit.  
128 Cum quo se Nymphae pariter mersere sub undas.  
129 Expavit sic raptus Hylas pavidusque petebat  
130 herbida quod vitreum tellus perfuderat antrum.  
131 Deiopea tamen cunctas hortata sorores  
132 alloquitur puerum : " Non te decet ora rigare  
133 fletibus, alme puer ; ploret deformis imago,  
134 non est flere tuum. Mundum tibi nullus ademit :  
135 nos rosa, nos violae, nos lilia pulchra coronant,  
136 nos Hyacinthus amat, noster Narcissus ab undis,  
137 fontigenis dat certa comis redimitque capillos  
138 quicquid floris olet, quicquid dant prata ru boris .  
139 Tu noster jam sponsus eris sine fine dierum ".  
140 His dictis mentem pueri mulcebat amica  
141 interea furibundus adhuc Tirynthius ibat  
142 et clamans quaerebat Hylan ; cui litus et unda

143 Herculea cum voce sonant et nomen amati  
 144 montes, silva vocant ; tantum fons ille tacebat,  
 145 in quo raptus Hylas. Cum jam remearet ad astra  
 146 post factum pinnatus Amor matrique triumphum  
 147 apportaret ovans, vocem deus Herculis hausit  
 148 et gemitus quaerentis Hylan. Cui gesta fatetur,  
 149 Alcidis comitem fontis rapuisse puellas,  
 150 ignibus Idaliis exustas Herculeas spes.  
 151 Obrigit gemitque simul clavamque remisit :  
 152 "O frustra nutrite, puer, spectator ubique  
 153 virtutis per cuncta meae (te teste pericla  
 154 saepe tuli, cum victus aper, cum fracta leonis  
 155 colla Cleonaei telo parcente necantur,  
 156 cum simul Antaeum rapui Telluris alumnum) :  
 157 quis mihi sudorem lasso post proelia terget ?  
 158 Quis comes alter erit cum dat fera bella noverca ?  
 159 Quid matri narrabo tuae, quae te mihi parvum  
 160 deposuit pietatis inops ? Quae pignora reddam  
 161 cum conventus ero ? Dicam tamen ipse parenti :  
 162 " Exulta, genetrix, nimium laetare, beata  
 163 ante parens hominis, pulchri modo numinis auctor ".

## PRAEFATIO

R3 v.1 Fructibus apta quidem cunctis est terra creandis,  
 2 altius intendens sed causas perspice partus  
 3 et totum cognosce poli. Nam rore maritat  
 4 arva suo vel sole fovet vel temperat aestus  
 5 alternans elementa potens, ut reddat et umbras  
 6 montibus arboreis et culmos armet aristis,  
 7 ventilet et matrem gravidam pendentibus uvis  
 8 pampinus exultans et palmes verberet uvas  
 9 contortusque fluat nodo viridante corymbus  
 10 et nunquam positura comas flectatur oliva.  
 11 At si temperies rerum opportuna negetur,  
 12 infecunda forent squalentia viscera terrae  
 13 et limos obducit ager deceptus inertes :  
 14 discipuli sic quippe silent, si forte magister  
 15 tollatur, doctrina potens. Qua praeduce dictator  
 16 antistesque tuus, de vestro fonte, magister,  
 17 Romuleam laetus sumo pro flumine linguam  
 18 et pallens reddo pro frugibus ipse poema.  
 19 Tu mihi numen eris, si carmina nostra levaris,  
 20 nam tua sint quaecunque loquor, quaecunque canemus.

R4 VERBA HERCULIS CUM VIDERET HYDRAE SERPENTIS CAPITA PULLARE POST CAEDES  
 v.1 Juppiter omnipotens, celsi moderator Olympi,  
 2 cur mihi viperei fetus mala fata minantur ?  
 3 Te regnante, parens, in me conjurat iniqua  
 4 serpentum cristata manus ; sed forte superbi  
 5 nunc caelum, terras, pontum, fulmenque trisulcum  
 6 heredes et Juno tenent, seu fulgidus ortu  
 7 desilis ad terras, seu jam defessus anhelis  
 8 sideris occasu maestus tua regna relinquis.  
 9 Paenitet, alme parens, vestra de stirpe creatum  
 10 Alciden, quia nullus honos et mille pericla.  
 11 Nam quodcumque malum superas evincit in auras,

12 Herculis hostis erit. Per nos nam bella geruntur,  
 13 Juno noverca furens potuit quae victa parare  
 14 privigno (natum quem comprobat esse Tonantis,  
 15 dum nobis immensa jubet) ; me quoque triumphis  
 16 horrida bella manent, et nunquam stare licebit  
 17 hoste sine, trucibusque diu concurrere monstris  
 18 compellor. Genitor, te in nosmet pessima conjux  
 19 horrescit : misero semper tu causa pericli es.  
 20 Nam mihi reptanti tumida cervice dracones  
 21 Juno duos misit, quis frontem crista tegebat,  
 22 flammea lux oculis, pro spumis taetra venena,  
 23 sibila vibrabant linguis sub dente trisulcis :  
 24 terror erat visus cunctis sonitusque draconum.  
 25 Quos manibus ridens compressi parvulus ambos.  
 26 Hi tribuere mihi primum pro morte triumphum  
 27 et letum, non praeda fui Junonis alumnis.  
 28 Hostes deesse mihi dixi post bella leonis,  
 29 quem nullo mucrone peti nec retibus ullis  
 30 implicui : fretus manibus nec Maurus ad illum,  
 31 (lacune...)  
 32 Cujus pelle tegor. Nunc fortiter ecce tabescens  
 33 tertia bella gero, quae caedes passa resurgunt.  
 34 En totiens percussa lues magis extitit ardens  
 35 et nunquam sternenda venit. Pro fata nefanda,  
 36 vincere pejus erit : propriis nam viribus ipse  
 37 impugnor. Saevos gladius mihi suggerit hostes,  
 38 non rapit ecce meus, sed proelia victa reformat.  
 39 Huc quicumque deus /rater mihi summus Olympo es,  
 40 huc ades et miseri tandem succurre periclis ;  
 41 sed quaeso venias soboles ut nulla novercae,  
 42 quamvis sis frater. Jam tu succurre, Minerva  
 43 bellipotens, patrius cui casside fulgurat ardor,  
 44 quae clipeo rutilante tonas, quae fulmina vibras,  
 45 pectore saxifico cui militat impia Gorgon.  
 46 Intemerata soror de vertice missa Tonantis,  
 47 sudori succurre meo. Quibus artibus angues  
 48 extinguam, qui sponte petunt mucronis acumen ?  
 49 Ut crescunt gaudentque mori fera colla draconum !  
 50 Caesa vigent, alter surgit de vulnere serpens.  
 51 Consilium mihi virgo dedit : " Quia mucro laborat  
 52 incassum, gelida flammis exure venena  
 53 et praestent cum morte rogos ; caput omne perurat  
 54 ignis edax anguesque crement post vulnera flammae ".

#### CONTROVERSIA DE STATVA VIRI FORTIS

[oratio soluta]

##### PROOEMIUM

R5 v.1 Quis furor iste novus ? quae tanta licentia ferri ?  
 2 Poscitur ut civi liceat prosternere cives  
 3 et facinus sub laude gerat crimenque triumphum  
 4 dicat et hostiles patriae revocare sagittas  
 5 civili sub lege velit, viduare maritis  
 6 matronas, orbare patres, jugulare propinquos.  
 7 Reliquias belli scelus est cum lege necare,  
 8 pro quibus arma tulit. Mitis si vinceret hostis,  
 9 parceret atque humiles vellet servare catervas.  
 10 Jam non pro patria vir fortis bella gerebat

11 defendens umbone latus, per proelia cristas  
 12 dum quateret galeatus apex, aciesque cruentas  
 13 letifero mucrone premens : sub imagine civis  
 14 impius hostis erat merito, qui vincere vellet,  
 15 ut cives jugularet ovans. Optate tyrannos  
 16 jam, proceres, vincant hostes quibus aspera mens est  
 17 nec studium post bella manet. Dum classica rumpunt  
 18 hostibus externis, gravis est inimicus in armis ;  
 19 post aciem dominus mitis qui vicit habetur  
 20 aut ex hoste manet simplex ac fidus amicus,  
 21 si bellum sub pace cadat. Quod sentio prodam :  
 22 jam, cives, formido, mei, vos ergo cavete :  
 23 hostibus obstrictus patriae de clade pacisci  
 24 clam potuit, qui saeva parat, qui colla propinqui  
 25 civis et insontis nititur truncare cruentus.  
 26 Perdidimus quoscunque viros, forte iste necavit :  
 27 classica dum reboant et Martia tela pluuntur,  
 28 inter ferratas acies lituosque sonantes  
 29 obvius armato juveni si civis adesset,  
 30 quid faceret qui in pace furit, qui turpibus instat  
 31 mortibus insontum, qui funera pressa reformat ,  
 32 Servati civis nunc sunt ubi praemia quercus ,  
 33 Reddite bella, duces, inimicas reddite gentes :  
 34 barbarus omnis eat, rapiant simul arma Suevus.  
 35 Sarmata, Persa, Gothus, Alamannus, Francus, Alanus,  
 36 vel quaecunque latent gentes aquilone remotae  
 37 in nos tela parent : minor est pavor. Advena campo  
 38 producat armatus : muris servare salutem,  
 39 si nequeas pugnare, licet, Cum cive per urbem  
 40 infelix quid civis agat ? Quid ? Nocte dieque  
 41 moenia, rostra, forum, capitolia, templa, penates  
 42 illustrans et fana simul, delubra, theatra  
 43 circumeat cum cive malo, cum cive cruento ?  
 44 Nullus ab insidiis locus est qui fraude vacabit.  
 45 Adde quod iratus victor cum lege minatur  
 46 et lator legis civilia jura repellit,  
 47 ut legem premat ipse suam, quam sanxerat ante.  
 48 Dum victor post bella redit, cum testis imago  
 49 formatur virtutis, honos et gloria campi,  
 50 laetantur humiles, gaudebat turba reorum  
 51 et veniam meruisse putant. Quis civis asylum  
 52 credat in arce micans insontibus esse periculum ?

#### NARRATIO

53 Pauper adest miserandus, inops, sed civis honestus,  
 54 semper egens, humilis, dignus quem dives amaret,  
 55 cujus in obsequio famulari posset alumnus,  
 56 torva superborum sineret si turba clientum.  
 57 Qui dignum servire putans indignus habetur  
 58 vel fastiditur supplex. Inimicus et hostis  
 59 divitis arguitur pauper, qui vota clientis  
 60 ausus habere miser : nec haec tamen ipse meretur,  
 61 sed probus horretur. Domibus magis ille potentum  
 62 liber amicus erit, quisquis vult esse satelles :  
 63 quo praesente nefas committitur atque siletur,  
 64 aut scelus hoc si forte sonet, tamen ille negabit  
 65 sponte petens tormenta, cruces, per membra, per artus  
 66 carnifices flammam proprio satiare cruore,

67 tortoris laudare manum ; pro divite poenas  
 68 si patitur, si vincla gerens ergastula portet,  
 69 se reputet cruciasset alios ut crimina celet.  
 70 Ut talis dives qualis mendicus amari  
 71 possit et infelix, ad crimina conscius esto.  
 72 Ut teneant fauces obsessas nocte latrones  
 73 aut pelagi rabidos fluctus pirata vagetur  
 74 nec timeat validas sub tempestate procellas,  
 75 praeda jubet. Petulans ut luxurietur adulter  
 76 et tractet de clade viri, de morte mariti  
 77 (ultima cena datur, quam praestat adultera conjux  
 78 pocula mortifero corrumpens blanda veneno :  
 79 cum gaudet conviva, perit), spes crimina ducit  
 80 ad facinus, cum lucra petunt. Impune libido  
 81 dum peccare cupit, vindex subducitur aequi  
 82 quem perimit sub fraude reus. Cuicumque furori  
 83 est operae pretium, sperant sua praemia culpae.  
 84 Conicitur " cuicumque bono " quod Cassius inquit.  
 85 Crimina temptentur, fortisque in paupere dives  
 86 quid timet aut optet, vos saltim advertite, cives.  
 87 Res est nulla domi cupiat quam dives avarus,  
 88 non aurum, non gemma micans, sed turpis egestas  
 89 obsedit jejuna fores. " Audacia forsitan  
 90 pauperis horretur, ne clam temerarius exstet ",  
 91 Quando fugax praesumptus erit vel debilis audax ?  
 92 Nam si fortis erat saeva virtute, superbus  
 93 praemia non veniam peteret sub sorte reorum.  
 94 Qui nihil admisit crimen dat prava voluntas  
 95 divitis insonti. Furor est voluisse necare  
 96 pro quibus arma tulit. Quid prodest pellere bellum,  
 97 si revocat post bella neces ? Aut pacta nefanda  
 98 hostibus obstrictus servat qui civibus instat  
 99 ut pereant, aut ipse cupit magis esse tyrannus,  
 100 civibus extinctis credens sua vota latere.  
 101 Si jugulet miseros injusta morte necando  
 102 suspectos quoscunque putat, nihil ergo relinquet :  
 103 omnia sunt suspecta reo. Sin moribus esset  
 104 Ille bonus, servare pios, servare modestos  
 105 debuerat sub pace sua, non colla nefandus  
 106 [lacune]  
 107 aut inimicorum mallet fudisse cruorem,  
 108 quorum verba pavens dives vixisset honeste.  
 109 Sic sapiens olim Romana potentia jussit  
 110 ne pereat Carthago nocens, inimica senatus  
 111 et populi Aeneadam : cotem virtutis habendam.  
 112 Sed ne Trojugenis per tempora pigra lacertis  
 113 torporem pax longa daret, post victa rebellis  
 114 et consumpta simul jacuit congesta ruinis ;  
 115 et tamen haec renovata micat quibus occidit armis.  
 116 Haec igitur recidiva viget post busta resurgens  
 117 Phoenicis in morem. Virtus clementia patrum :  
 118 tu testis Carthago manes invita volensque.

## EXCESSVS

119 Quod scelus est, juvenis ? Socios in bella tueris  
 120 et cives in pace necas : quid fata minaris  
 121 impia supplicibus ? Quid funestare triumphos  
 122 contendis post bella tuos et luctibus imple ?

123 Nec pudor est variasse viro ? De cive tropaeum  
 124 nemo triumphator rapuit nec in arbore cristas  
 125 erexit quicumque cruci suspendit. Imago  
 126 vestra, caput civis, manes mereatur et umbras ?  
 127 Virtutis vestrae circumdent funera testem  
 128 et ybrtis simulacra viri civile cadaver  
 129 polluat ac putres effundant ossa medullas ?  
 130 Victoris genio sanie cum tabe litetur ?  
 131 Quaere sacerdotem : veniet crudelis Erictho,  
 132 haec est apta tuis antistita saevior aris,  
 133 quae calidas rapiat fibras pulmonis anhelis,  
 134 sorbeat ereptum vel morsibus illa cruentis  
 135 vel vivente jecur, vel cor cum palpitat intret  
 136 dentibus obscaenis, lingua lambente palatum  
 137 prostrati civis. Haec sint tua munera, victor ?  
 138 Hostia talis eat, talis tibi victima pergat ?  
 139 Sit tua terribilis Phalaris ceu taurus imago ?  
 140 Taurica crudelis mitis tamen ara Dianae  
 141 nec Busiris atrox Aegyptius ille cruentus :  
 142 solus enim per templa deum sine morte propinqui  
 143 sacra peregrinus funestat et advena tantum,  
 144 illaesus nam civis erat. Tu, victor, inique,  
 145 Sardorum qui sacra probas et moenia foedas  
 146 lauro cincta tua, vestris ornata coronis.  
 147 Insula delubris natorum colla secabat,  
 148 verticis unde comam vera pietate parentes  
 149 illaesa cervice metunt. Carthago duorum  
 150 annua nobilium praestabat funera templis  
 151 Saturnoque seni pueros mactabat ad aras.  
 152 Tristia plangentum foedabant ora parentum.  
 153 Hoc vir fortis agis ? Rapiuntur viscera matri  
 154 et perit ante oculos genitoris pignus amatum  
 155 aut populo spectante cadet ? Cum Troja periret,  
 156 filius Aeacidis vel vindex Pyrrhus Achillis  
 157 ante oculos Priami percussit nocte Politen,  
 158 belli jure furens. Tamen ultio digna relata est :  
 159 ipse Neoptolemus jacuit percussus ad aras.  
 160 Qualiter en pietas se vindicat, impie victor !  
 161 Quid matris patriae venerandam polluis arcem ?  
 162 In qua templa sedent, ubi numina saepe precati  
 163 fleximus, ut sospes rediens et victor in armis  
 164 captivos post bella trahens ex vulnere lassos  
 165 intrares patriam, ne saevus vinceret hostis,  
 166 qui scandens muros cives laniaret in urbe.  
 167 Hoc matres puerique rogant, hoc ipsa senectus,  
 168 virginitas hoc casta petit, hoc pauper adorat.

QVAESTIO : AT INQVIES : SED PAVPER INIMICVS INSIDIANter POTVIT DE MORTE DIVITIS COGITARE

169 Si potuit, voluisse puta. Nam vita potentis  
 170 non jacet insidiis nisi divitis atque propinqui  
 171 aut certe si scepra vigent sub regis avari  
 172 imperio. Fortem timidus formidat et horret,  
 173 non fortis lassum timuit nec dives egentem.  
 174 Debilis est pauper, nudus, mendicus, egenus :  
 175 quem macies suprema tenet, quem frangit egestas  
 176 Unde necem potuit pauper tractare potentis ?  
 177 Solus abit pauper nec se circumspicit unquam  
 178 nec timet insidias semper bene conscius insons.  
 179 Sollicitus multos metuit quem turba veretur :



180 circumdant famuli, plures stipantur amici ;  
 181 divitis obsequio concurrat turba clientum,  
 182 sic iter aptatur vel transitus ille paratur,  
 183 audeat ut nullus hoc praetereunte venire.

QVAESTIO : AT INQVIES : SED POTEST VENENVM PAVPER DIVITI SECRETATA OBREPTIONE SVPPONERE

184 Taetra venena neci pretio majore parantur  
 185 et munus secreta fovet : qui conscius unquam  
 186 incorruptus erit, quis non sit forte redemptus  
 187 quantum dives habet, quantum nec pauper habebit ?  
 188 Adde quod infelix pauper nec nocte propinquat  
 189 divitis ad tectum. Nam mox pro fure tenetur,  
 190 nocturnus grassator erit, ferietur inermis  
 191 et prostratus inops armabitur ense cruento,  
 192 ut gladium strinxisse putes in fata potentis  
 193 divitis ante fores. Medicos aut forte ministros  
 194 sollicitare potest audax sub nocte silenti,  
 195 qui sub luce fugit ? Pavidos informat egestas ;  
 196 divitiae vires praestant animosque resumunt,  
 197 paupertas conferre metus, afferre pavorem  
 198 novit et in miseros semper stimulare potentes.

QVAESTIO (...)

199 Forsitan obicias " Urbis defensor habetur " ;  
 200 " non opus est laedatur ", ais. Nec laedat honestos,  
 201 in commune bonus totos defendat et ornet,  
 202 erigat oppressos, mediocris, pauper ametur.  
 203 Non ideo bellum tota virtute peregit  
 204 ut liceat civi cives impune necare.  
 205 Fortior est dives juvenis, magis inde timendus.  
 206 Divitiae fortes semper fecere tyrannos :  
 207 hinc Marius, hinc Sylla ferus, hinc Cinna cruentus,  
 208 inde fuit Caesar, dominatio prima senatus.  
 209 Nam domitor Libyae, bellorum Scipio fulmen,  
 210 fortis adultus adhuc totos qui vicit Hiberos  
 211 Hannibalisque trucem fregit per bella furorem  
 212 ac populatorem Romanae gentis adegit  
 213 sorbere mortiferum ceu pocula blanda venenum  
 214 et caput infaustum legatus vexit ad Urbem,  
 215 Minturnas depulsus obit. Pius inde Camillus  
 216 missus in exilium nec Romula tecta videret  
 217 ni satis offerret, victor licet exul ab Urbe,  
 218 cum Romanorum Gallis vexilla tulisset ;  
 219 exul et extorris meruit de clade triumphum.  
 220 Mentibus ingenuis semper pro lege tenete :  
 221 solliciti veniam debent sperare potentes,  
 222 securi ne regna petant. Das otia servo :  
 223 mox liber vult esse suus. Jam nemo quietus  
 224 divitis insidiis durabit paupere caeso.

QVAESTIO : AT INQVIES : SED LEGI PARENDVM EST, QVAE SANXIT VT VIR FORTIS OPTET PRAEMIVM QVOD VOLET

225 Si leges tractare placet, veniatur ad illas :  
 226 " Accipiat quodcunque velit vir fortis et optet ".  
 227 Hoc cupit et pauper, pro voto divitis instat,  
 228 ut maneat lex lata rogat. Venialis imago  
 229 aut valet aut certe simulacrum lege perempta.  
 230 Interea non aera micent, non marmora surgant  
 231 nec sub lege pia fortis nova praemia quaerat,  
 232 quae damnat mox sponte sua. Non summovet unquam

233 legis cauta furor, quam dant pro laude triumphi.  
 234 Instar habent hostis quos sanctio nulla coerces.  
 235 Condemnat solus civilia jura tyrannus.  
 236 Nonne triumphantis legem si forte superbus  
 237 temneret aut parvi pendens quicumque negaret,  
 238 sacrilegus temerator, iners inimicus et hostis  
 239 publicus ille foret ? Legum secreta tribunal  
 240 jam quateret strepitu juvenis, fora nostra creparent,  
 241 ipse cicatrices subducta fronte recentes  
 242 pectoris effossi populo monstraret et urbi,  
 243 " Virtutis laesae gravis est injuria Marti "  
 244 clamaret per templa Jovis, per templa Minervae,  
 245 " nemo aciem subeat, nullus prorumpat in hostem "  
 246 diceret, infremerent omnes uno agmine cives.  
 247 Pauperis, o proceres, languentia colla sinetis  
 248 carnificis truncare manum. Non arma tubasque  
 249 tollitis et saltem civilia bella movetis ?  
 250 Quid, plebs nostra, taces ? Dives praejudicat urbi  
 251 et pariter tua jura negat. Praescriptio surgit,  
 252 quae populo vitam libertatemque negabit.  
 253 Non gemitis, non fletis adhuc, non arma paratis ?  
 254 Laudis erit, fateor, pro libertate perire :  
 255 nam pro Verginia cum plebs arderet in ira  
 256 montis Aventini tenuit Romana cacumen,  
 257 cum pater egregiam prostravit morte puellam  
 258 impietate pius ne Claudius esset adulter.  
 259 Nec populus liber capto de monte rediret,  
 260 plebs nisi sumpsisset cum libertate triumphum.

## EPILOGI

261 Vidimus, o cives, fugientis pauperis ora  
 262 cum manibus quaesisset opem sine voce rogantis.  
 263 Diximus : " Hostis adest. Veniat vir fortis et adsit,  
 264 cujus inops simulacra tenet, cui crura lacertis  
 265 cinxit et ad plantas prostratus plangit egenus  
 266 belligerum ceu numen habens ". Dum pronus adhaeret  
 267 divitis optata praesentia turbida rostris  
 268 apparet. Conclamat inops : " Succurrite cives,  
 269 civis adest violentus, atrox, mea fata requires,  
 270 quem nihil offendi, nisi quod sum pauper honestus.  
 271 Ecce, triumphalis, metuendum, dextera, ferrum  
 272 id quod in hostiles jugulos ex urbe tulisti,  
 273 in Patria revocare velis ? Ne viscera matris  
 274 transadigas gladio, laceres ne membra parentis,  
 275 quae te palmiferis docuit concurrere telis.  
 276 Parce, precor, ferrata manus : civilia colla  
 277 ne ferias, quae mucro tuus defendit ab hoste.  
 278 Sit pudor atque nefas extinguere proelia campo  
 279 et mortes transferre foro ". Lamenta minora  
 280 credimus auditu : dolor est spectare cadentem,  
 281 funera sive oculis vivum vidisse cadaver  
 282 cum gemit et moriens tremibundos palpat artus.  
 283 Mugitus quos ille dabit per moenia pauper,  
 284 cum vulgo spectante cadet, cum membra cruore  
 285 perfundat moribunda, solo cum mordet harenam :  
 286 anguibus implicitum credas Laoconta gementem !  
 287 Sic decet ut fortis lassos, ut dives egentes  
 288 cives civis ames ? Aut sic defenditur insons ?

289 Si vocem simulacra darent, tua signa rogassent  
 290 et dolor ista daret deflendis verba querelis :  
 291 " Dic, juvenis dives, patriae, dic, fortis amator,  
 292 si pauper reus est, tua quid peccavit imago,  
 293 virtutis monumenta tuae ? Quid testis honorum  
 294 temnitur et patriae foedantur moenia nostrae ? "  
 295 Haec simulacrorum vox est. Patriaeque gementis  
 296 audi verba tuae : " Merito te laeta creavi,  
 297 infantem gremio tenui, simul ubera parvo  
 298 urbs mater tremibunda dedi, cunabula praestans,  
 299 quem praetextatum jaculis proludere jussi :  
 300 impubes jam fortis eras, invictus adultus  
 301 et juvenis victor. Sed ne fraudatus abires  
 302 fortunae quocunque bono, largitur honores,  
 303 divitias confert, tribuit per bella triumphos.  
 304 Et pro tot meritis instas orbare parentem  
 305 pignore percusso, cui nil fortuna bonorum  
 306 contulit injusto censens moderamine fatum ?  
 307 Si ratio te nulla movet, si mente cruenta  
 308 humana pietate cares, imitare leones  
 309 quos feritas generosa juvat : super arma tenentes  
 310 ingruere fremitusque dare procul ore cruento  
 311 nobilis ira solet, subjectis parcere gaudent  
 312 et praedam rabies contempsit fulva jacentem.  
 313 Gramina non tangunt, feriunt sed fulmina quercus.  
 314 Nunquam taurus iners lassa cervice Tonanti  
 315 victima fessa datur, sed jam quis grandia surgunt  
 316 ingentes per colla tori, quos fronte superba  
 317 pascua cornigeros armant in bella juvencos.  
 318 Hostia victorem funestat languida, pauper  
 319 si mactatus erit. Sed sint tua sacra coronae,  
 320 sint hederæ, lauri, quercus, et palma triumphi,  
 321 sint clipei, galeae, contus, lorica tropaeum.  
 322 Accipe tura potens deus ut Tirynthius aris,  
 323 ut Thebis partus, magnus cum Castore Pollux  
 324 semidei post fata vigent : his quintus adesto  
 325 virtutis ratione, fide, pietate, vigore,  
 326 possessure polos, scandens qua lacteus axis  
 327 vertitur, aetherii qua se dat circulus orbis  
 328 lunarisque globus qua volvitur axe tepenti  
 329 aut certe qua Phoebus agit super astra jugales :  
 330 sidera sic capies, poteris sic astra mereri ".

EPITHALAMIVM IN FRATRIBVS DICTVM

R6 v.1 " Egregii juvenes, o gloria summa parentum,  
 2 foedus amicitiae, solamen grande clientum,  
 3 dulcia cantatis dum votis carmina vestris,  
 4 facundos vos fecit amor. Venus alma, potestas  
 5 Delphica, flammipotens invasit templa Cupido :  
 6 tempora jam lauro vel myrto cingite frontes  
 7 et violis ornate comas, dent alba coronas  
 8 lilia mixta rosis, candor pallorque ruborque  
 9 crinibus insidat qui vernat in ore puellis,  
 10 floribus ambrosiis sponsalia sarta ligentur.  
 11 Saltet Apollineum Musis cantantibus agmen,  
 12 laurea sarta comis imponat pulchra Dione,

13 Pallados armisonae crinem praecingat oliva,  
 14 arma ferat Martis, quibus et proludere nostis  
 15 et bellum, si tempus eget, perferre valetis.  
 16 Interius vos Musa Venus Phoebusque, Cupido  
 17 et Bromius possedit Hymen. Mars saltat amores  
 18 et Venerem placare cupit, cui militat omnis  
 19 marcidus et nudis ludit post arma lacertis,  
 20 ac furibundus Amor Veneris per castra triumphat :  
 21 in praedam venere dei vincente Dione.  
 22 Ergo, Venus, te, docta, voco, facunda perita,  
 23 per sensus te funde meos ; tua gaudia fervent.  
 24 Sponte venire decet, non te decet ire rogatam.  
 25 Sufficiant tibi vota, Venus (praecordia dura  
 26 mollis adire soles, nolentibus ire per artus  
 27 et mentes intrare senum venasque levare  
 28 ignibus et gelidas calidis reparare favillas,  
 29 ut veteranus amet senior ceu nuper adultus) :  
 30 non ego lascivos opto mihi crescere sensus,  
 31 sed, precor, aspergant nostrum tua carmina pectus,  
 32 ut valeam cantare tuos per vota triumphos  
 33 et mixtis saltare choris, cantare choreas.  
 34 Publica magnifice per moenia vota geruntur :  
 35 quas dedit una domus, domus excipit una sorores,  
 36 quorum umbone tegor vel quorum munere vivo :  
 37 post varios casus, post tot discrimina vitae  
 38 porrexere piam placido pro tegmine dextram  
 39 et, quod majus erat, laesi tribuere salutem  
 40 fortunamque mihi reducem pietate novarunt.  
 41 Quisquis adest sapiens scholasticus atque peritus  
 42 accurrit laudare volens, cantare paratus :  
 43 quantum ego festinem laudes et carmina ferre  
 44 pro meritis animisque virum ? Puer alme Cupido,  
 45 ignea progenies et rerum perpes origo,  
 46 huc ades armatus fluidis post terga pharetris,  
 47 indue pinnatis, precor, oscula blanda sagittis,  
 48 morsibus alternis ut lambens lingua palatum  
 49 tergat et udentur suspensis dentibus ora.  
 50 Sponsa maritales cognoscat utraque vapores  
 51 et sponso sic jungat amor quasi corpore in uno  
 52 bracchia virgineis annectens stricta lacertis.  
 53 Has matronali societ de more catervae  
 54 blanditus sub fraude dolor sub vulnere casto  
 55 servatumque diu rapiat hac nocte pudorem  
 56 et poenae sit merces amor, pia pignora, nati. "  
 57 Vix ea fatus eram, subito venit aliger, ignis  
 58 ore micans ac fronte minax et crine coruscans,  
 59 impubes lascivus, erat cui castra voluptas.  
 60 Ibat in obsequium Risus, amplexibus haerens  
 61 justa Libido coit, venit et moderata Voluptas,  
 62 candida legitimas accendens Gratia taedas  
 63 occurrit, venit alma Fides, petulantia simplex,  
 64 casta Pudicitia procedit mente quieta,  
 65 sobrietas per cuncta vigil devota cucurrit  
 66 et quicquid justos solite comitatur amores.  
 67 Liber pampineis ornatus fronte corymbis  
 68 intrat et uviferos vibrat super agmina thyrsos ;  
 69 Pan calamis perflare melos Bacchaeque rotari  
 70 Sileno saltante placent populosque movere

71 in fescenninos fremitus et gaudia mentis.  
 72 Affuit interea Cypris ; subvecta columbis  
 73 apparet de parte poli qua flammeus axis  
 74 volvitur australis collustrans cardinis oras :  
 75 florea purpureas retinebant frena columbas  
 76 et rosa blandifluas rutilans nectebat habenas,  
 77 lilia sunt inserta rosis juga pulchra volucrum ;  
 78 verbere purpureo Cypris jubet ire jugales,  
 79 remigat ammotis pinnarum plausibus ales.  
 80 Moenia respexit Carthaginis alma Cythere,  
 81 " Illo ", dixit, " aves, convertite, mando, volatus :  
 82 Victoris soboles felici sorte jugantur.  
 83 Illic pura fides, illic prudentia simplex,  
 84 conjugis in gremio pietas, sine fraude voluntas ;  
 85 non ibi livor edax, non est elata potestas,  
 86 privato sub more gerens sua jura modeste  
 87 quae mercede sua multos conjunxit egentes :  
 88 haec inopes dotare solet vel pascere egenos,  
 89 legibus et nostris nudas vestire puellas. "  
 90 Dixerat haec Cytherea parens. Jam tecta subibant  
 91 Idaliae volucres : occurrunt Gaudia cuncta  
 92 obsequium latura deae ; tamen ore modesto  
 93 anxia sola procul thalamo florente relicto  
 94 Virginitas pudibunda fugit gratumque pavescens  
 95 fletibus ora rigat ; quae non reditura recedit.  
 96 At Venus attingens urbem petit antra mariti  
 97 Neptunisque domos intravit Maximianas :  
 98 illic turba fremit matrum juvenumque pudica  
 99 et matronali sponsas cinxere corona,  
 100 pompa catervarum felix votiva canebat :  
 101 "Progenies crementa domus Victoris honesta  
 102 suscipit et nuribus natos junxere parentes ;  
 103 Victorianus enim fratres et Rufinianus  
 104 lege maritali veniunt sub jura Dionae. "  
 105 Tunc Venus ad sponsas intrans hac voce profatur :  
 106 " Crescite fecundis gaudentes lusibus ambae,  
 107 nocte tamen properante viris certate modeste,  
 108 sed hoc certamen modico luctamine constet :  
 109 acrior est puer ille meus, dum temnitur, et plus  
 110 urit amoriferis certantia membra sagittis. "  
 111 Dixerat et puerum genitrix implere pharetras  
 112 imperat. Ille libens imbutas melle ssigittas  
 113 misit et ambarum sensus transfixit harundo,  
 114 corda ferit juvenum veniens et pectora fratrum  
 115 quorum vota sonant. Longa est lux ipsa diei,  
 116 et cupiunt transire diem ; succedere noctem  
 117 exoptant paribus votis spatiumque morarum  
 118 lucis adoptatae transire in tempora noctis.  
 119 Pergitur ad thalamos, convivia laeta celebrant,  
 120 agmina saltantum miscentur lusibus aptis.  
 121 Pignora pulchra micent et talia vota celebrent,  
 122 floribus et vestris crescat generata propago.

EPITHALAMIVM IOANNIS ET VITVLAE

R7 v.1 Carminis Idalii cuperem nunc ebrius esse  
 2 nobilium thalamis Fabiani sanguinis index.  
 3 Quod mihi si felix hodie fortuna dedisset,

4 non inhonorus eram, sed laude redemptus abirem  
5 vere reatus agens, si non tamen ipse renatus  
6 emerito ferrem generosas auspice laudes,  
7 et Vitulae canerem taedas per vota Joannis.  
8 Laurea sarta comis religans et tempora myrto  
9 prodere gestirem haec quae nunc per vota geruntur.  
10 Cantarem quia Cypris adest, bona mater Amorum,  
11 agmine mollifluo ducens sua pompa choreas,  
12 impubes lascivus atrox violentus amoenus  
13 lis pacis tacitusque loquax fur garrulus audax,  
14 nudus et armatus, ferus et pius, improbus insons,  
15 et quod amoriferum secum huc duxisse volucrem.  
16 Vulgarem quia tela gerit, quibus auctor Achillis  
17 arserit Aeacides nymphae radiatus amore ;  
18 spicula dixissem, quibus arsit Apollo disertus,  
19 cum peteret Daphnen, Liber quibus arserat Indus,  
20 candida Dictaeae cum cerneret ora puellae,  
21 vel quibus, ipse furor, Mars est accensus amore,  
22 Vesticolae niveos peteret cum virginis artus,  
23 ut daret aeternum Romana in saecula Quirinum  
24 et post fata deos faceret super astra senatus.  
25 Sed quia captivo fas non est dicere carmen  
26 nec reticere licet festivo in tempore vati,  
27 ista canant pueri, quia carmine vera loquentur ;  
28 plausibus insultent et tympana rauca puellae  
29 percutiant palmis, digitis sub harundine ventos  
30 dispensent hinc inde melos perflante labello  
31 et quatiant dulces Museo pectine chordas,  
32 et vocis textura sonet nervique loquaces.  
33 Bybliades Satyris jungant Nymphisque hymenaeos  
34 et Dryades passim coeant per prata Napaeis,  
35 Naiadas Faunis jungant et Oreadas omnes,  
36 et Bacchis copletur Amor per castra Dionae ;  
37 saltet et imparibus calamis Pan corniger intrans,  
38 ebrius interea nutet Silenus asello.  
39 Oscula nectantur calamis imbuta rosatis,  
40 et nervo cedente sonet nova murmura lingua,  
41 morsibus alternis suspensio dente fruuntur.  
42 Gratia vernantes annectat pulchra dolores ;  
43 casta Pudicitia stricto placitura marito  
44 floribus ex variis texat per prata coronas  
45 lilia mixta rosis socians violasque hyacinthis ;  
46 purpuret et niteat gemmae pallente rubore  
47 Sardoasque juget rosulis Sitifensibus herbas.  
48 Sic puer Idalius permiscet raella venenis,  
49 sic rosa miscetur spinis, medicina cerastis  
50 perficitur stimulisque favos apis alma tuetur :  
51 sic pia Virginitas non tollitur ante pudoris  
52 unguibus infensis quam vulnerat ora mariti,  
53 et prior ante sui vindex est ipsa cruoris,  
54 ut discat sacras fecundo vulnere flammam.  
55 Sic fiunt dulces modo pignora blanda parentes,  
56 et genus humanum sic stat sub lege perenni.  
57 Tot bona proveniant sponsis quot dextra parentum  
58 jungit amoriferas per festa jugalia palmas.  
59 Cana Fides Pietasque jugent et casta Voluptas  
60 bracchia constringat celeres visura nepotes.  
61 Pronuba Juno venit fecunda sorte maritans

62 lanigera comitante dea per vota Minerva,  
63 concordisque simul celebrent pia sacra Dionae.  
64 Ista canant juvenes, hoc cantent carmen adultae  
65 et simplex aetas, pueri teneraeque puellae ;  
66 cantilet hoc veteranus amor, reverenda senectus  
67 cantet : amator erit qui non cantarit amores,  
68 nescit enim senibus veniam donare Cupido.  
69 Ast ego, qui nequeo captus mea plectra movere  
70 carmine, sollicito dederant quia carmina clades,  
71 et modo sic positus, Cythereae cantibus absens,  
72 sollicitus, tabidus, temerarius, anxius, audax :  
73 ut vacat expositis post proelia miles ab armis,  
74 saucius atque gemens quo languida vulnera curet,  
75 classica si subitis feriant clangoribus aures,  
76 it dolor, ira redit, ceu jam sit plaga cicatrix,  
77 redditur et saniem sistit furor arma repossens  
78 (fit medicina furor, furor et vox tessera Martis  
79 et dare jam membris discit tuba rauca salutem) ;  
80 aut velut acer equus circi juga ferre dicatus,  
81 orbita cornipedo sequitur quem ducta volatu,  
82 si, fretus propria voluntate, favoris alumnus  
83 plus eat in frenos et concitus axe sonoro  
84 pulveris in nubem radiatis orbibus actas  
85 accipiat post crura rotas et corruat ictus,  
86 mox studium dolor omnis habet plangente colore,  
87 adversa plaudente manu, stabulisque refertur :  
88 hinnitus si forte sonent strepitusque rotarum  
89 et favor excussus caveis circensibus ingens,  
90 elevat elisum : directis auribus audax  
91 erecta cervice caput tremibundus et artus  
92 pensat nec stabulum fessis hinnitibus implet  
93 (jam qua stat pluitur tellus sudore furoris),  
94 vulnera despiciens absentibus ora lupatis  
95 ingerit et vacuos dat post praesepia cursus ;  
96 aut avis insidiis curvato vimine clausa,  
97 quae cantu mulcere solet sub voce canora  
98 arboreum per cuncta nemus durosque labores  
99 agricolum, silet intus habens captiva dolorem  
100 libertatis amans auras nemorumque cacumen  
101 et tacet omne melos retmens sub voce silenti :  
102 altera si resonet modulatis cantibus ales,  
103 ingenuos dat capta sonos quasi libera, vernans  
104 ut credatur avis ramo cecinisse virenti,  
105 illa tamen querulas miscet male garrula voces ;  
106 sic ego captivus tot festis plausibus actus  
107 carmina pauca feram delectis ipse duobus  
108 ex genere amborum, qui me modulante canentur :  
109 pontifices sacri Statulenus Optavianus  
110 moribus innocuis, sancta pietate modesti,  
111 religione pii, castis altaribus apti,  
112 quorum cana fides per sacra palatia pollens  
113 floruit (unus erat Latialis mysticus aulae,  
114 alter apud Danaos sacrata mente dicatus) ;  
115 quorum sanguis adest, quos omina fausta juvabunt :  
116 ex hac progenie junctis et gente togati  
117 conjugio tali speremus numina nasci !  
118 Nam mihi quod teneor non est dolor alter acerbus  
119 quam quod apud tales oblivio longa moratur

120 nominis inclusi. Sed si me claustra fatigant  
 121 temporis immodici, nec vos impune tacetis :  
 122 poena est non levior vobis quatiante pudore,  
 123 quod licet exiguum tamen inter jura poetam  
 124 temnitis immemores facunda mente periti.  
 125 Quid prodest servasse hominem per tanta pericla  
 126 et clausum liquisse diu sub clade salutis ?  
 127 Non male peccavi, nec rex iratus inique est,  
 128 sed mala mens hominis, quae detulit ore maligno,  
 129 et male suggessit tunc et mea facta gravavit.  
 130 Poscere quem veniam decuit, male suscitatur iras  
 131 et dominum regemque pium saevire coegit.  
 132 Nam Deus omnipotens compunget corda regentis,  
 133 quando jubet pietate sua veniamque relaxat.  
 134 At cum liber ero domino ignoscente reductus,  
 135 dum tacet os vestrum nec nos sermone juvatis,  
 136 nomina vestra, reor, praeconia nulla manebunt.  
 137 Sed ne maesta canens concludat carmen amoris,  
 138 post haec vota parens quid sit factura Dione,  
 139 murmuret os tacitum, Carales cum coeperit iri :  
 140 Aeolias petet illa domos aditura tyrannum,  
 141 ut frenet ventos et caerula marmora tendat,  
 142 mollior aura means tantum bona flamina mittat,  
 143 ut ratis incolumis Sardorum litora tangat.  
 144 Nec negat haec Eolus Veneri sua jura roganti.  
 145 Cypris in ornatu veniens freta glauca vagatur,  
 146 cum pelagi Nymphis ibunt Tritones alumni  
 147 Nereidum spumante choro Phorcique clientes  
 148 gurgitis aequorei pisces immania cete  
 149 et quaecunque latens surget de fluctibus imis  
 150 belua terribilis summas gestire per undas ;  
 151 inter quas delphine sedens Galatea minaci  
 152 Neptunum perfundet aquis : rorante fluento  
 153 ille caput barbamque ciet ridente Dione.  
 154 At volucer Veneris volitans super aequora pinnis  
 155 jam spargens sub fraude rosas tamen igne sagittas  
 156 mandat ad aequoreos comites et frigida ponti  
 157 aequora flammatur atrox, elementa ut vota celebrent.  
 158 Haec dixisse sat est, sed qui modo jure tacemus,  
 159 omnia reddemus quandoque nepotibus almis.

DE RAPTIVAE HELENAE

R8 v.1 Trojani praedonis iter raptumque Lacaenae  
 2 et pastorale scelerati pectoris ausum  
 3 aggrediar meliore via. Nam prodimus hostem  
 4 hospitibus et thalami populantem jura mariti,  
 5 foedera conjugii, consortia blanda pudoris,  
 6 materiem generis, sobolis spem, pignora prolis :  
 7 nam totum de matre venit, de matre creatur  
 8 quod membratur homo ; pater est fons auctor origo,  
 9 sed nihil est sine matre pater : quota portio patris  
 10 omnis constat homo ? Mater fit tota propago.  
 11 Ergo nefas Paridis, quod raptor gessit adulter,  
 12 ut monitus narrare queam, te grandis Homere,  
 13 mollia blandifluo delimas verba palato ;  
 14 quisquis in Aonio descendit fonte poeta,  
 15 te numen vult esse suum ; nec dico Camenae  
 16 te praesente " veni " : sat erit mihi sensus Homeri,



17 qui post fata viget, qui duxit ad arma Pelasgos  
18 Pergama Dardanidum vindex in bella lacesens ;  
19 et qui Trojanos invasit nocte poeta,  
20 armatos dum clausit equo, qui moenia Trojae  
21 perculit et Priamum Pyrrho feriente necavit :  
22 numina vestra vocans, quicquid contempsit uterque  
23 scribere Musagenes, hoc vilis colligo vates.  
24 Reliquias praedae vulpes sperare leonum  
25 laudis habent, meruisse cibos quos pasta recusant  
26 viscera, quos rabies jam non jejuna remisit  
27 exultant praedamque putant nuda ossa ferentes.  
28 Attica vox te, sancte, fovet, te lingua Latina  
29 commendat : vulgate, precor, quae causa nocentem  
30 fecit Alexandrum raptu spoliaret Amyclas.  
31 Caelicolum praetor jam sederat arbiter Idae :  
32 jam gremium caespes, jam surgens herbida tellus  
33 stabat et aetherium fuerant herbosa tribunal.  
34 Solverat Iliacus caeli vadimonia pastor  
35 et litem facit ipse suam : laudata recedit  
36 contempta Junone Venus. Tunc virgo decore  
37 victa dolet, nam tristis abit : heu nescia mens est,  
38 quae mala circumstent ausum dare jura Minervae.  
39 Judicis Idaei pretio sententia fertur  
40 damnaturque Paris ; nec solus pastor habetur  
41 ex hac lite reus : damnantur morte parentes,  
42 damnantur fratres, et quisquis in urbe propinquus  
43 aut cognatus erat, cunctos mors explicat una.  
44 Atque utinam infelix urbs tantum morte periret !  
45 Damnantur gentes, damnatur Graecia sollers  
46 heu magnis viduanda viris ; orbatur Eous  
47 Memnone belligero, damnatur Thessalus heros  
48 et Telamone satus, pereunt duo fulmina belli.  
49 Pro matris thalamo poenas dependit Achilles  
50 (unde haec causa fuit), forsan Telamonius Ajax  
51 sternitur invictus, quod mater reddita non est  
52 Hesione Priamo ; sic est data causa rapinae,  
53 cur gentes cecidere simul, cum sexus uterque  
54 concidit, infanti nullus post bella pepercit.  
55 Sic dolor exurgit divum, sic ira polorum  
56 saevit et errantes talis vindicta coercet ?  
57 Compellunt audere virum fata, impia fata,  
58 quae flecti quandoque negant, quibus obvia nunquam  
59 res quaecumque venit, quis semita nulla tenetur  
60 obvia dum veniunt, quibus omnia clausa patescunt.  
61 Jam grex horretur, fontes casa pascua silvae  
62 flumina rura pigent nec fistula dulcis amatur ;  
63 non placet Oenone, sed jam prope turpis habetur,  
64 ex quo pulchra Venus talem promisit in Ida,  
65 qualis nuda fuit : talem jam pastor anhelat.  
66 Sordent arva viro post jurgia tanta dearum,  
67 Pergama sola placent et moenia quaerere Trojae  
68 mens et fata jubent. Monitus Paris omnia norat  
69 blandita nutrice puer, quo sanguine cretus,  
70 qui genus, unde domus ; rapiensque crepundia pastor  
71 Trojanum carpebat iter. Vix viderat arcem  
72 lassus, et intactae procumbunt culmina turris,  
73 ingemit et tellus, muri pars certa repente  
74 concidit et Scaeeae jacuerunt limina portae ;

75 tunc Simois siccavit aquas, crystallina Xanthi  
76 fluminis unda rubet, sudat pastore propinquo  
77 Palladium vel sponte cadunt simulacra Minervae.  
78 Forte dies sollemnis erat, quo Pergama rector  
79 infelix Priamus post Herculis arma novarat :  
80 annua persolvens ingratis munera divis  
81 Laomedontiades capitolia celsa petebat  
82 reddere vota Jovi, laturus sacra Minervae.  
83 Ad dextram genitoris erat fortissimus Hector,  
84 Troilus ad laevam pavido comitante Polite ;  
85 cetera natorum turba stipata subibat.  
86 Reginam interea natarum turba coronat  
87 et nuribus comitata venit pia vota ministrans :  
88 rex Helenum sequitur, Cassandrae mater adhaeret.  
89 Dum pergunt et templa petunt, prorumpit in agmen  
90 pastor et attonitos elata voce salutatur :  
91 " Sis felix, princeps, omnes salvete sodales  
92 aut fratres, ut vera feram : tu fortior Hector,  
93 culmen et urbis apex, et viribus indolis alme  
94 Troile : frater ego, fratrem cognoscite vestrum.  
95 Germanus sum vester ego Priamique propago,  
96 Hecuba mi genitrix, abdicor crimine nullo :  
97 parvus Alexander pastor nutritur in Ida.  
98 Nec pastor sit vile, Phryges : ego jurgia divum  
99 compressi, nam lite caret me iudice caelum.  
100 Si credis, germana manus (nec cetera regis  
101 conscia corda negant nec mater pignus abhorret),  
102 noscite depositi vel certa crepundia, fratres. "  
103 Dixerat et testes generis projecit in arce.  
104 Verba fides pietas quatiunt mox corda parentum,  
105 ammissumque nefas generosa mente fatetur  
106 fusus in ora rubor. Paridis mox colla lacertis  
107 alligat et natum fletu gaudentis inundat  
108 convictusque pater veniam de prole negabat.  
109 Obstupere omnes. Mater gavisam recurrit  
110 (dat celeres pietas gressus quos denegat aetas),  
111 mox juvenem complexa tenet : per colla per ora  
112 oscula diffundunt et lambere membra parentes  
113 insistunt juvems certatim, sed pius ardor  
114 affectus dispensat, agens alternat utrique  
115 et vicibus cara Paridis cervice fruuntur.  
116 Nuntius interea totam compleverat urbem :  
117 fama volat per templa deum, quod pastor ab Ida  
118 se velit ostendi regni de stirpe creatum.  
119 Tunc Helenus vates templum dimisit et aram  
120 et procul exclamat : " Pater impie, pessima mater,  
121 quid pietas crudelis agit, quid perditis urbem ?  
122 Haec est illa tuo fax, mater, prodita somno,  
123 quae simul incendet Trojam regnumque parentum  
124 in sortem dabit illa nurus. Conjurat in arma  
125 Graecia tota dolens raptum punire Lacaenae,  
126 litora nostra petent Danaei cum mille carinis,  
127 Dorica castra fremunt, jam Pergama vexat Achilles,  
128 jam pugnant Danaei, jam cernimus Hectora tractum,  
129 Troile, jam per bella furis, jam sterneris audax  
130 ante annos, animose puer, virtute protervus.  
131 Sed quid fata veto, quid fixos arceo casus,  
132 cum nihil adversis prosit prudentia signis ?

133 Me fortuna potens expectat Pyrrhus et ingens. "  
134 Dum loquitur, Cassandra venit furibunda sacerdos  
135 et matrem complexa canit : " Quid, mater iniqua,  
136 quid, pater infelix, quid funera nostra paratis ?  
137 Immemor heu pietas : uni pia mater haberis  
138 pastoremque foves, sed multis impia constas  
139 regibus, Hectoreum supplex emptura cadaver  
140 per montes per saxa datum ; nec venditur Hector  
141 integer et lacerum retines pro pignore corpus  
142 funeris Hectorei pretio majore redemptum.  
143 Me stuprum per templa manet, me pessimus Ajax  
144 invadet pereunte domo. Jam Troja crematur,  
145 sed flammis, rex, ipse cares ; jamque Hecuba latrat,  
146 Astyanax Danais muro jactatur ab alto.  
147 Sic praestat Bellona nurum, gener ipse Tonantis  
148 Idaeus sic pastor erit capietque triumphum,  
149 sed post ipse cadet. Veniet mox Pyrrhus ad arma,  
150 qui scindat muros, qui damnet Pergama flammis,  
151 qui Priamum gladio fervens obtruncet ad aras.  
152 Sed quid vana cano ? Jam consocer esse Tonantis  
153 vult genitor patriamque premit natosque nefandus  
154 odit et Andromachen quaerit viduare marito.  
155 Troile, quid cessas ? Quid parcis, fortior Hector ?  
156 Vos repetunt mortes, in vos mala fata feruntur,  
157 vos petit Aeacides, saevum vos fulmen Achilles  
158 amputat, insontes poenam raptoris habetis.  
159 Provida non credor. Vos saltem surgite, cives,  
160 rumpite complexus quos dant per colla parentes  
161 infausto juveni, muris depellite fratrem !  
162 Hic hostis quem fata canunt, qui mortibus urbem  
163 congeret et Priamum faciet non esse sepultum.  
164 Pectore Cisseo rapiatur pignus acerbum  
165 macteturque nefas et Pergama nostra pientur,  
166 placetur Juno, placetur virgo Minerva,  
167 sacrilegi de morte Jovem placate Tonantem,  
168 cujus postponens Vulcani laudat amorem.  
169 Urbibus in multis mos est donare Salutem  
170 mortibus insontum, sed vos mactate nocentem,  
171 ut liceat servare pios. Augere dolores  
172 ut resecat medicina solet membrisque salutem  
173 membrorum de parte dabit ; nam corporis aegri  
174 fit jactura salus et vires passio praestat  
175 quas auferre solet. Hoc vos assumite fratres,  
176 hoc cives audite mei, laudate parentes :  
177 dicite pastorem gladio pietatis obire,  
178 fraterno mucrone cadat. Si forte profanus  
179 hunc feriet quicumque reum, sit in urbe sacerdos :  
180 cedo ; loco si forte meo pius esse recusat,  
181 pontifices Helenus Laocon, sacrata potestas,  
182 cedent oranti vel mysticus extat uterque. "  
183 Dum canit infelix gemitus Cassandra futuros,  
184 visus adest cunctis Phrygibus Thymbraeus Apollo,  
185 qui mercede carens conclusit Pergama muro  
186 et genus ingratum poenas persolvat avari  
187 exoptat : stupuere Phryges, tacet ipse sacerdos.  
188 Effatur : " Quid virgo canit ? Cur invidus alter  
189 exclamat ? Helenus deterret Pergama verbis ?  
190 Pellere pastorem patriis de sedibus unquam

191 fata vetant, quae magna parant. Stant jussa deorum :  
 192 magnanimum Aeacidem solus prosternet Achillem.  
 193 Trojanos regnare placet, qua solis habenae  
 194 ostendunt tolluntque diem, qua vertitur axis  
 195 frigidus et zona flammatur sole corusco.  
 196 Trojanis dabitur totus possessio mundus,  
 197 tempore nec parvo Troum regnabit origo.  
 198 Fata manent, conscripta semel sunt verba Tonantis,  
 199 " imperium sine fine " dabit. Cohibete furorem.  
 200 Mortali divum periet quo iudice iudex ?  
 201 Nec hoc fata sinunt. Pudor est voluisse nocere  
 202 et non posse tamen. Pigeat, jam nemo minetur  
 203 quem Clotho, quem Lachesis, quem vindicat Atropos ingens.  
 204 Scindite pellitas niveo de pectore vestes,  
 205 murice Serrano ruulans hunc purpura velet.  
 206 Nec pudeat, quod pavit oves : ego pastor Apollo  
 207 ipse fui domibusque canens pecus omne coegi,  
 208 cum procul a villa fumantia tecta viderem ;  
 209 Alcestam sub nocte pavens deus ubera pressi,  
 210 Admetus intrantes haedos numerabat et agnos. "  
 211 Dixerat, et Phoebum Priamus summissus adorat  
 212 et grates securus agit, tacet optimus Hector.  
 213 Jam regno non impar erat, sed sceptrum tiaram  
 214 imperium trabeas jam post caeleste tribunal  
 215 totum vile putat, solam cupit addere famam  
 216 majorum titulis, vivaces quaerere laudes,  
 217 ut celet quod pastor erat. Vix viderat aulam  
 218 regis, et Iliacas quaerit per litora puppes ;  
 219 Aegaeum sulcare fretum jam mente parabat.  
 220 Sic pater alloquitur juvenem sermone verendo :  
 221 " Nate, redux pietatis amor, bonus arbiter Idae,  
 222 dic, ubi vis armare rates, ubi carbasa tendis ?  
 223 Nusquam bella paro, regnum sub pace guberno.  
 224 Sed si torpor iners pudor est et turpe vacare  
 225 credis, Alexander, certe legatus adesto  
 226 et Telamona ducem conventum exposce sororem  
 227 Hesionem mox, nate, meam : captiva tenetur  
 228 me regnante soror. Dum Dorica regna peragras,  
 229 dat Venus uxorem, faciet te Juno maritum. "  
 230 Tunc juvenis gavisus ait : " Paremus ovantes,  
 231 optime Trojugenum, nihil est quod jussa recusem. "  
 232 Laetatur senior tali moderamine nati ;  
 233 effatur : " Tua vota, Paris, di justa secudent ;  
 234 hoc tantum supplex genitor rex, nate, precatur :  
 235 Iliacos proceres tres tecum pergere saltem  
 236 imperio concede meo : veneranda senectus  
 237 praecipitem frenat monitis per cuncta juventam.  
 238 Egregios comites praestem, tria lumina gentis  
 239 Hectore praelato, cui tota potentia cedit :  
 240 Antenor Polydamas erunt juvenisque Dionae  
 241 Aeneas cognatus adest. " Sic fatus et omnes  
 242 ut veniant rex ipse jubet properante ministro.  
 243 Cum ducibus redit ipse volans ad tecta satelles  
 244 regia ; cognoscunt proceres quo vela parantur.  
 245 Nec mora, conscendunt puppes et litora linquunt.  
 246 Dardana jam Tenedon classis transibat, Abydon  
 247 et Seston dimisit aquis curvasque Maleas ;  
 248 jam Salamina vident Telamonia regna petentes.

249 Ut portum tetigere rates, mox ancora mordet  
 250 litus et inventas ferrum pertundit harenas ;  
 251 puppibus annexis terram Trojana juvenus  
 252 et proceres petiere simul, sed regis ad aulam  
 253 linquentes mox litus eunt. Quos suscipit heros  
 254 hospitio Telamon. Ramos frondentis olivae  
 255 portantes ad tecta ducis sub imagine pacis  
 256 non pacem, sed bella gerunt ; nam dicta tenebant,  
 257 quae possent armare virum, nisi jura vetarent  
 258 hospitii, quae nemo parat violare modestus.  
 259 Rege solutato postquam legatio Trojae  
 260 sedit, et Antenor placida sic voce profatur :  
 261 "Trojugenas proceres et regis pignus ad aulam,  
 262 rex Telamon, venisse tuam quae causa coegit,  
 263 insinuare decet ; si jusseris ipse, loquentur  
 264 consortes nunc ore meo vel regia proles.  
 265 Dardanides Priamus, gentis reparator et urbis,  
 266 quam vestras populasse manus meminisse fatemur,  
 267 jussit ab Iliaco delectos pergere regno  
 268 ad tua regna, potens, germanam regis ut, heros,  
 269 bellorum quam jure tenes, in pace refundas :  
 270 posceris Hesionem. Jacet ingens Troja favillis  
 271 excidii compressa sui, nec Pergama ductor  
 272 surrexisse putat, nisi jam, rex magne, sororem  
 273 reddideris regi, quae nunc captiva tenetur.  
 274 Turpe ducis servire genus crimenque putatur,  
 275 si non bella dabunt regi quod bella tulerunt.  
 276 Si pax hoc optata negat, pro rege rogaris :  
 277 te repetisse puta Priamo retinente sororem ;  
 278 non dolor armaret, si non daret ille rogatus ?  
 279 Quod peteris, Telamon, scelus est et fama pudoris ;  
 280 nascitur invidia, Priamo regnante sororem  
 281 Grajugenis servire suam, livor malus inde  
 282 creditur : " Iliacas potuit reparare ruinas ",  
 283 murmur erit Phrygibus, " consortem sanguinis unam  
 284 non valuit" dicent " rector de rege mereri". "  
 285 Dixerat. At Telamon mentes armabat in iras ;  
 286 nam pietas affectus amor concordia proles  
 287 accendunt motus in pectore fellis amari.  
 288 Conubium regni, thalami consortia casti  
 289 scindere poscebant, et, quod mens nulla tulisset,  
 290 Ajacis haec mater erat. Sic incipit ore  
 291 turbidus Aeacides justa succensus in ira :  
 292 " Si pudor Iliacis aut mentibus esset honestas,  
 293 excidium Trojae si pectora victa dolerent,  
 294 Herculeos comites Priami gens, praeda Pelasgum,  
 295 non magis auderent in bella lacessere Graios  
 296 semideum post bella ducum, quibus Ilios ingens  
 297 victa jacet. Placuitne Phrygis perjuriam gentis  
 298 solvere vos iterum ? Sic dudum parva luistis  
 299 supplicia ? Priamo, Troes, mea dicta referte :  
 300 victori quis victus ait : " Te bella gerente  
 301 me maneat virtutis honos, me praeda sequatur,  
 302 praemia me laudis, me praemia cuncta triumpho  
 303 expectent, sterili victor sed laude potitus  
 304 et jejunos eat" ? Quis regi quisve marito  
 305 vel misero sic ausus ait cum voce proterva :  
 306 " Conubium rescinde tuum, rumpatur honesto

307 foedere juncta domus, thalami damnentur amantum,  
 308 festivas extingue faces " ? Quis vicit, ut istud  
 309 audiat Aeacides, patriam qui perculit hosti ?  
 310 Quando tamen victor victi sub lege tenetur ?  
 311 Si Priami recidiva domus manet illa tyranni  
 312 post ignes reparata meos, si pendit amorem  
 313 germanae rex ipse suae, pro dote sorori  
 314 vel regni pars justa detur, ne vindicet Ajax  
 315 quod matri donasset avus, si Troja maneret.  
 316 Temporibus soceri senuit si Graia juvenus,  
 317 quam nostis per bella, Phryges, successit in armis  
 318 bellipotens ducibus cunctis optata propago.  
 319 Est mihi bellipotens non vilis pignoris Ajax :  
 320 eminent et quaerit de qua jam gente triumphet ;  
 321 Thessalus Emathia fratris nutritus Achilles  
 322 emicat et torvos exercet in arma bifformes  
 323 Patroclo populante simul Centaurica lustra ;  
 324 Tydides Sthenelusque fremunt Ajaxque secundus ;  
 325 Nestoris Antilochus Palamedes Teucer Ulixes  
 326 exultant quod Troja redit, quod Pergama surgunt".  
 327 Tunc Polydamas ait summissa voce profatus :  
 328 "Belliger armipotens, animarum judicis heres,  
 329 rex cui de nostris est gloria summa ruinis,  
 330 temperet invidia, frangat dolor, ira quiescat.  
 331 Captivam repetit, reginam frater honorat,  
 332 nos et adoramus. Non sic, si Troja maneret,  
 333 nuberet Hesione : regnum captiva meretur,  
 334 fit felix de sorte mala, fit praeda potestas,  
 335 imperium de clade tenet, diadema tiaram  
 336 qui tulit ipse dedit. Quae sit gens Dardana, rector,  
 337 exhinc nosce precor : nescit servire subacta,  
 338 quam melius regnare decet ; haec imperat Argis,  
 339 per quos victa perit ; dominam sibi Graecia victrix,  
 340 non famulam quaesivit ovans. Miranda per orbem  
 341 mens generosa ducis, quae non vult regna gravare,  
 342 cum ruerint virtute tua ! Relevare jacentes  
 343 et reges regnare jubes regesque creare,  
 344 dum possent servire tibi. Sors cassa duelli  
 345 te moderante vacat nec possunt bella nocere.  
 346 Te vincente, potens, quis nolit victus in armis  
 347 sorte tua post bella capi ? Qui vicerit hostis,  
 348 serviet, et victi melius te praesule regnant. "  
 349 Haec legatus ait. Regis jam corda tepescunt,  
 350 quae fuerant accensa nimis. Sic magna leonis  
 351 ira fremit, cum lata procul venabula cernens  
 352 venantis crispare manu jam verbera caudae  
 353 craribus incutiens spargit per colla per armos  
 354 erecta cervice jubas, jam tenditur altus  
 355 dentibus illisis et pectus grande remugit  
 356 (flumina tunc resonant, montes et lustra resultant) ;  
 357 ast ubi venator rejecta cuspede sollers  
 358 sponte cadit pronusque jacet, perit ira leonis,  
 359 turpe putans, non dente suo si praeda jacebit ;  
 360 temnit praedo cibos, quos non facit ipse cadaver,  
 361 ignoscens feritate pia, veniale precatus  
 362 venator si cesset iners : sic rector Achivus  
 363 frangitur et Phrygibus convivium laeta parari  
 364 per septem jubet ipse dies. Cythereus et Ajax

365 colloquium commune tenent, duo fulmina belli ;  
366 regis Alexandrum juvenem regina Pelasgum  
367 Hesione complexa fovet, germana parentis ;  
368 vultibus in Paridis Priami laudatur imago.  
369 Octavo veniente die jam sidera Phoebus  
370 elatis condebat equis, jam cuncta rubebant  
371 oceano nudante rotas stridentibus undis ;  
372 tunc Anchisiades sublimi voce profatur :  
373 " Rex invicte armis, felix in pace senesce,  
374 quamvis nemo ducum vos unquam in bella lacessit,  
375 ex quo Troja perit, nec vester creverat Ajax.  
376 At modo, rex, ter cuncta domans ter cuncta revellens,  
377 murus erit sociis, aries metuendus in hostes  
378 Ajax, magne, tuus ! Priamo tua dicta loquemur. "  
379 Sic fatus. Dixere " vale " regemque salutant.  
380 Tunc iter ad portum vertunt et litora tangunt.  
381 Conscendere ratem, subducitur ancora mordax,  
382 vela levant nautae, proras a litore torquent ;  
383 puppibus incumbit ventus, mox carbasa tendit,  
384 dum fluctus scindunt et prospera flamina crescunt.  
385 Africus interea veniens comitante procella  
386 turbidus occurrit, mox sparsit in aequore classem.  
387 Gurgite curvato rapiuntur ad astra liburnae  
388 et suspensus aquis per nubila nauta cucurrit  
389 navigium vectante salo. Dum summa ceruchis  
390 sidera tacta putant et nil superesse fatentur  
391 montibus aequoreis, malo venit altior unda  
392 naufragiumque diu ratibus suspensa minatur  
393 desuper intentans pelago veniente ruinam.  
394 Jam ventus subduxit aquas, extundit harenas  
395 pressa carina solo ; murus stat celsior unda  
396 circumfusa rati, vastarum turris aquarum  
397 pendet et elati percellunt carbasa fluctus.  
398 Obrigit per membra Paris, transire parabat  
399 ad legatorum propria de nave carinas.  
400 Ast ubi dispersos longo videt aequore Troas,  
401 solvitur in gemitus lacrimosae vocis amarus  
402 et sic orsus ait : " Felici sorte creati  
403 pastores, quos terra capit, quos nulla procella  
404 concutit. Haut ponti metuunt super aequora fluctus  
405 et rabidum pelagus temnunt latrantibus undis,  
406 sed celso de monte vident ut in arce sedentes  
407 pascua rura nemus fontes et flumina prata,  
408 per campos gestire pecus, pendere capellas  
409 praerupta de rupe procul dumeta sequentes :  
410 ut virides tondent lascivis dentibus herbas !  
411 Ubera lactantes contundunt frontibus agni,  
412 dum cauda crispante tremunt mollique palato  
413 exultant potare cibos atque edere potus.  
414 Mulgere balantum depressis ubera mammis  
415 decedente die noctis venientibus umbris  
416 quantus amor, cum lacte novo jam caseus albens  
417 formatur manibusque premit lac pastor ad orbem !  
418 Candida summittit ferventes bucula tauros  
419 committitque duces armata fronte juvencos.  
420 Nam gravis est regnare labor, metus excutit ingens  
421 corda ducum, ne bella ruant, ne tela minentur  
422 exitium crudele : necis timor omnis ubique est.

423 Nam gladios tellure pavent pelagoque procellas  
424 formidant nec plena datur ducis hora quieti. "  
425 Dum loquitur, venit unda gravis resonatque fragore  
426 et puppim percussit aquis : sublata carina  
427 tollitur et Cypro classi depulsa resedit.  
428 Post signum venere rates recidente procella  
429 et cyprum tenuere simul. Legatio sola  
430 defuit, una fretis et fluctibus acta negatur  
431 puppis in Ionium rabidis collisa procellis ;  
432 Aegaeo nam pulsa caret. Mox pastor harenis  
433 Dardanus exiluit tremulis post aequora plantis  
434 et se cum sociis tacta tellure refovit.  
435 Cypro festa dies natalis forte Dionae  
436 illa luce fuit. Veniunt ad sacra Cytherae  
437 reddere vota deae quicquid capit insula Cypros,  
438 quod nemus Idalium, quod continet alta Cythera,  
439 quod Paphon exornat, tacitas quod lustrat Amyclas.  
440 Candida praeterea Jovis alitis Helena proles  
441 venerat, absentem retinet dum Creta maritum.  
442 Nuntia fama ducis totam repleverat urbem,  
443 advenisse Parin Trojano sanguine cretum.  
444 Audit ut adventum juvenis Spartana decori,  
445 mox jubet et famuli veniunt mandante Lacaena :  
446 hospitio speratus eat, nam turpe videri,  
447 regina praesente Paris ceu navita vilis  
448 litus harenosum teneat. Tunc hospes ad aulam  
449 pervolat Atridis socia comitante caterva.  
450 Praeceptum dum carpit iter festinus ad urbem  
451 respicit ad templum Veneris, cui turba precantum  
452 vel conventus erat ; mox vertit iturus ad aras.  
453 Interea nivei volitant per litora cycni  
454 flumine contempto, placidas hinc inde columbas  
455 molliter intendunt omnes per inane vagari ;  
456 quas insanus agit rapidusque sequente volatu  
457 miluus insontes cunctas clamore fatigat,  
458 quas super accipiter volitans gravis imminet ales.  
459 Tunc sollers augur cretus de gente Melampi,  
460 quem fors ad Cyprum dederat per festa dierum,  
461 et sic orsus ait prorumpens voce sagaci :  
462 " Te oblativa petunt avium responsa volantum :  
463 conubium spondent praefulgens ore decoro  
464 Idaliae volucres, de gente Tonantis olores  
465 promittunt genitam, sed miluus horrida fata ;  
466 Ditis enim signatur avis, licet hora peracta  
467 tertia quippe sinat Phoebos candente volucrem  
468 vera per immensum praesagia ferre rapacem ;  
469 Martius accipiter dotem fera bella minatur. "  
470 Tunc Paris ad caelum tendens cum lumine palmas  
471 numina magna vocat puerum matremque Dionem :  
472 " Aurea siderei proles Venus alma Tonantis,  
473 numina mille tenens, artes cui mille favendi  
474 dat pater et natus supplet simul, omina firma,  
475 quae cycnus genitoris agit, quae vestra columba  
476 prodidit. Infaustos opus est cohibere volatus :  
477 Martius et inferni volucres raptoris obuncas  
478 augur averrunces sacris, quibus imperat auctor  
479 Troius ille puer Ganymedes, conditor artis,  
480 et Polles, cui pinna loquax dat nosse futura. "



481 Pauca precatus erat supplex et templa subibat  
482 vestibus indutus Tyriis et murice regni  
483 perfusa chlamys ipsa fuit, quam purpura fulgens  
484 flammabat diffusa humeris ; hanc fibula mordax  
485 jungit, et ornatus juveni plus ammovet aurum,  
486 quo distincta micat radians per stamina vestis.  
487 Cetera turba comes Phrygio succincta decore  
488 fulgebat. Delubra petens intravit ad aras  
489 pastor et in sese cunctorum lumina vertit :  
490 aspicit hunc errans oculis ornata Lacaena,  
491 effigiat per cuncta virum, quibus ille decorus  
492 vestibus incedat vel qua lanugine malas  
493 umbret et in roseo prorumpat flosculus ore.  
494 Laudat amans mirata virum flammata Lacaena  
495 ignibus Idaliis ; nam dudum flammiger ales  
496 matre jubente puer telo candente medullas  
497 Ladaei partus furtim jaculatus amorem  
498 usserat. At pastor repetit post sacra Dionae  
499 hospitium. Regina venit pallente rubore,  
500 nam ilammis perfusa genas pallentibus ibat :  
501 fusus uterque decor manifestum vulgat amorem.  
502 Pastorem pudibunda petit cohibente pavore  
503 hortaturque virum fervens, qua stirpe creatus  
504 indicet, et fuerit qua jam vexante procella  
505 ad Cyprum pulsus. Medio sermone Lacaena  
506 jam tacet et quaerit juvenem quibus appetat ardens  
507 dictorum verbis. Sed pastor, perfidus hospes,  
508 ut sensit fragiles mulieris pectore sensus,  
509 incipit Iliacus non quo sit sanguine cretus  
510 nec quibus excussus ventis ad litora Cypri  
511 venerit effari ; trepidus jam voce remissa  
512 reginam laudabat amans, culpae maritum  
513 coeperat absentem, quod jam pulcherrima conjux  
514 a tepido deserta viro neglecta vacaret,  
515 sacra Dionaeae matris vel templa petisset,  
516 adjungens : " Si talis erit, quam forte merebor  
517 uxorem, sic blanda genis, sic ore modesto,  
518 sic oculis ornata suis, sic pulchra decore,  
519 candida sic roseo perfundens membra rubore,  
520 sic flavis ornata comis, sic longior artus  
521 et procera regens in poplite membra venusto ;  
522 tali semper ego dignatus conjuge felix  
523 non desim : famuler supplex et jussus adorem,  
524 conubio servus veniam sub lege mariti  
525 nocte dieque pavens quidnam velit illa jubere  
526 quae specie fulgente micat. Menelaus oberrat  
527 numine contempto non dicam, conjuge pulchra,  
528 quamvis numen adest veniens de stirpe Tonantis,  
529 unde genus duco. " Mox haec est verba locutus,  
530 Tyndaridis faciles quatiunt suspiria sensus  
531 et sic orsa refert : " Quae sit tua, pulcher, origo,  
532 te reticente magis dudum cognovimus omnes.  
533 Est commune genus : pariter tua regna petamus,  
534 sis mihi tu conjux et sim tibi dignior uxor.  
535 Hoc nam fata jubent vel nos hoc Juppiter urget :  
536 vivere me gemini jussit sub sorte mariti.  
537 Conferet Atridi quisquis me duxit amator,  
538 ut vivum linquam non jam moriente marito,

539 post thalamos primi cui debent fata secundum. "  
540 Dixit et egressi puppes et litora poscunt.  
541 Dum portus classemque petunt, respexit ad urbem  
542 pastor et ingentem vidit consurgere nubem  
543 pulveris extorti, movit quam turba sequentum.  
544 Tunc Paris alloquitur comitantem praedo rapinam :  
545 " Occidimus, regina, pares, nos Graia juvenus  
546 insequitur ; gladio vestigia nostra sequaci  
547 captatum pervenit iter quicumque satelles  
548 conjugis Atridis, subnixus et hospite turma,  
549 mox armatorum rapiens ad bella cohortes :  
550 et mecum fortasse cades, si tela sequentur. "  
551 Tunc Spartana refert : " Juvenis, quid nostra retardas  
552 pectora colloquiis ? Phrygibus tamen arma capessant,  
553 rex dilecte, jube, gressus celerare ministros  
554 imperio compelle tuo : properamus ad aequor,  
555 et vacat e jussis concurrens turba ministris. "  
556 Sic effata volens rapitur per colla tyranni  
557 jam Priami cum clade nurus ; sic terga juvenci  
558 Europam rapuere dei, cum Juppiter ipse  
559 taurus Olympiaca produxit cornua fronte ;  
560 fulmineus vector sobolem famulantibus undis  
561 gaudet Agenoriam caelestia colla gravantem,  
562 cum Cadmi cognatus aquas freta magna secreta.  
563 Ergo ubi pervenit raptor turbatus ad aequor  
564 et licet exhaustus cursu vel pondere lassus,  
565 qui gratum portabat onus, tamen ipse Lacaenam  
566 litore non posuit, media sed puppe locavit ;  
567 nautae vela levant et remis castra moventur.  
568 Adveniunt collecta manus jam classe remota  
569 et quatiunt omnes palmis in litore frontes,  
570 nunc galeas, nunc tela simul clipeosque tonantes  
571 proiciunt ; tunc ipse volans per rura maritus  
572 sudanti pervectus equo, quem nuntius horrens  
573 fregerat ad Cyprum venientem sacra dicare,  
574 ut conspexit amens sulcari puppibus undas  
575 et thalamos gestare suos, collisus harenis  
576 ingemit et flavos extorquet vertice crines.  
577 Hyrcanae sic saepe solent per devia tigres  
578 affectu stimulante rapi, cum pignora mater  
579 perdit et elusa feritas pietate nocentis  
580 raptoris sectatur iter, vestigia sollers  
581 insequitur praedonis equi, sessoris anhelii ;  
582 ast ubi torva parens transacto flumine natos  
583 secerni conspexit aquis, redit orba dolore  
584 et gemit infrendens amissum nobile pignus :  
585 Atrides sic maestus erat de conjugis rapta.  
586 Interea Aeneas rediens legatio Trojam  
587 venerat et Priamo Telamonis dicta reportat.  
588 Sed Paridem genitor postquam non vidit amatum,  
589 plangit et albentes immundat pulvere canos.  
590 Antenor Priamo pelagi narrare labores  
591 jam fletu manante genis et mille pericla  
592 coeperat ; ignarus quid de pastore procella  
593 fecerit aut juvenis classem si mererit unda  
594 nescius ore refert ; hoc tantum nosse fatetur,  
595 quod pelagi rabies subverso gurgite ponti  
596 sparserit Iliacas in tempestate carinas.

597 His dictis gemit aula ducis sub luctibus atris :  
598 moenia justitio foedant et plangitur urbe,  
599 sexus uterque gemit, non pro virtutis honore  
600 aut quod talis erat qui posset bella subire  
601 aut ingesta pati vel summis viribus hostem  
602 frangere et ensiferas acie jugulare cohortes  
603 (quamvis Alexander si viribus Herculis esset  
604 aemulus aut certe Meleagrū aut Thesea fortes  
605 aequaret virtute potens, tamen Hectore magno  
606 sospite nemo Parin lugeret corde dolenti),  
607 sed regis quia natus erat, fit planctus in urbe.  
608 Nam quicumque memor Heleni mox dicta tenebat,  
609 laetatur gaudens et tantum voce dolebat.  
610 Tunc pater absentī tumulum formabat inanem,  
611 ut jacuisse putes praesenti morte cadaver.  
612 Dum parat inferias genitor mactare sepulchro,  
613 non ubi corpus erat, vel nil satiāre cruore,  
614 per freta conspiciunt notam de litore classem.  
615 Prima ratis juvenis regali praedita signo  
616 apparet, quam sarta ligant ; ornata rosetis  
617 candida pepla volant et carbasa sericus ornat,  
618 et Veneris celsa spectatur ab arbore myrtus,  
619 quam sponsus defixit ovans. Occurrit ad undas  
620 Hecuba cum Priamo populi comitante caterva,  
621 suscipiunt sponsam, dat cunctis oscula pastor  
622 ad patrem Priamum gradiens matremque salutans ;  
623 dulcia colla tenent et vultibus oscula figunt.  
624 Non invitus adest, nec gaudet fortior Hector,  
625 quem Troilus sequitur non invitus tamen aeger,  
626 non membris sed mente gravis ; praesagia sensus  
627 concutiunt animosque viri : Mors ore cruento  
628 inter Trojanos discurrit saeva caterva,  
629 heu quantos raptura viros, quae fata datura  
630 aut quantas per bella nurus viduare parata !  
631 Troile, sectatur vestigia vestra Polites.  
632 Sic solet umbra sequax hominem larvalis imago  
633 muta sequi nec membra movet, nisi moverit ille  
634 quem sequitur ; si cesset homo, cessabit imago  
635 vel quodcunque movens si sederit, illa sedebit  
636 motibus et falsis veras imitata figuras,  
637 nil faciens quasi cuncta facit : sic quoque Polites.  
638 Duxerat uxorem pastor cum sorte sinistra ;  
639 jam muros, jam tecta petunt, jam regis ad aulam  
640 intratur sponsamque tegunt sua flammea pulchram,  
641 jam thalamis ornata sedet ; saltatur in urbe,  
642 tympana jam quatiunt, jam rustica fistula carmen  
643 pastorale canit. Lituus nil dulce remugit,  
644 fescennina silent et bucina bella minatur ;  
645 nec molles tuba rauca sonos dedit, aere canoro  
646 increpat arma duces clipeos et mille carinas ;  
647 classica Tydidis committere bella putares.  
648 Ite pares sponsi, jam somnia taetra probastis  
649 matris et ornati misero flammastis amore  
650 ostensam sub nocte facem, qua Troja cremetur,  
651 qua Phryges incurrant obitum sine crimine mortis.  
652 Sanguine Trojano dabitur dos, clade Pelasgum  
653 ditetur Ledaea fugax per castra propago,  
654 orbentur superi, caelum gemat et mare plangat

655 crimen adulterii talis vindicta sequatur.

DELIBERATIVA ACHILLIS, AN CORPVS HECTORIS VENDAT

PROOEMIUM

R9 v.1 Si decus est virtus et praemia cuncta meretur,  
 2 si meritum post prima manet, si fama superstes  
 3 eminent et gaudet titulis ornare sepulchra,  
 4 annue quod petimus. Fortis pro forte rogaris :  
 5 egregias mentes virtus delectat in hoste,  
 6 invidia mens summa caret, laudare decora  
 7 novit et ingentes attollere gestiet actus.  
 8 Dat virtus exempla bonis pravisque pudorem,  
 9 debilitas quos lassa premit. Tu, fortis Achilles,  
 10 quid prohibes tumulos, quamvis jactura sepulchri  
 11 temnitur et nihil est quodvis in morte periculum ?  
 12 Si sensus post fata perit, cur busta negantur ?  
 13 Si mens ulla manet, jam rectius ergo putatur  
 14 non requies, sed poena rogos : tormenta sepulchrum  
 15 ingerit et manes tolerant per membra dolorem.  
 16 Sed sensum cum luce simul post fata perire,  
 17 segnibus et pueris mentitur fama relatrix.  
 18 Sunt animae post membra piae, quas ignea virtus  
 19 tollit ad astra micans et solis in orbe recondit  
 20 lunares non passa globos ; ac desuper orbem  
 21 exspectant stellasque vagas et signa leonis  
 22 Augusto quid mense parent, quid cetera temptent  
 23 ornamenta poli. Rident sua membra videntes  
 24 funeris abjecti fragiles et corporis usus,  
 25 ut doleant animae jam libertate recepta  
 26 corporibus vixisse suis et claustra tulisse  
 27 carceris angusti. Tumulos aut ossibus urnas  
 28 dedignant animae, non curant vile sepulchrum  
 29 nec plangunt non esse simul, quas urna polorum  
 30 claudit et aetherium Phoebus suspendit ad axem.  
 31 Adventurus eris, pietas si sancta manebit  
 32 corpore belligero, si non crudelis in hoste  
 33 post vitam morientis eris, si immitis Achilles  
 34 nec post bella manes nec spectant funera poenas  
 35 arbitrio subjecta tuo, si parcitur umbris,  
 36 quaesitor quas torquet avus, si vera feruntur.

QVAESTIO AT INQVIES : SI POST VITAM ANIMAE CORPORA SVA DESPICIVNT, PRO HECTORE CVR ROGAMVS ?

37 Non Hector, sed Troja rogat miserique parentes,  
 38 Andromache viduata gemit vel ad ubera parvum  
 39 Astyanacta tenet, sic caelum questibus implet ;  
 40 virgo Polyxene lacrimis ornata decoris  
 41 et planctu laniata genas, contusa lacertos  
 42 ac longis dispersa comis onerata pudore  
 43 ingemit et tantum nutu sine voce precatur,  
 44 funeris Hectorei poscens exangue cadaver.  
 45 Quem retines iratus adhuc ; cognosce puellam.  
 46 Plangentis germanus erat, cui vita daretur,  
 47 ante aciem si visa foret, Trojaeque periclis  
 48 femina bella dedit, sed femina bella negaret.  
 49 Da veniam, juvenis. Magnum est punisse triumphos  
 50 Hectoris, hoc sat erit quod de victore triumphas ;  
 51 jam luctus converte tuos ad gaudia, victor,

52 gaudia qui Phrygibus sollers in funera vertis.  
 53 Infelix plus Troja gemit quam perdit Achilles  
 54 fortior occisi consurgens ultor amici.  
 55 Infremis Aeacides ? Qui vindicet Hectora, non est.  
 56 Anne Parin Fortuna jubet ? Qui crine madenti  
 57 inter lanigeras gaudet latuisse puellas  
 58 nec mater veneranda jubet, quod laudis habetur ;  
 59 hoc agit et pugnam thalamis exercet adulter,  
 60 pectore femineo Veneris nam bella lacessit,  
 61 ut Martis declinet opus vel fulmina campi  
 62 effugiat, magnoque jacet dotata Lacaena  
 63 sanguine Trojugenum, Graium dotata cruore.  
 64 Dardanidis quis murus erit post Hectora campo,  
 65 adversus Danaos quis Pergama fessa tuetur,  
 66 puppibus Argolicis Phrygios quis diriget ignes,  
 67 quis Telamone satum constans umbone tonantem  
 68 sustinet aut Teucris tolerat per bella sagittas ?  
 69 Quis hostis Diomedis erit, quae turma furentem  
 70 excipit ? In clipeum surgens cum torserit hastam  
 71 turbine belligero, quis non sine vulnere fractus  
 72 concidit et moriens tremibundos porrigit artus ?  
 73 Tydiden Aeneas rediens in bella lacesset,  
 74 a quo victus abit, qui impressit vulnera Marti ?  
 75 Nam niveam lusisse fuit plagare Cytheren.  
 76 Pergama Pelidi, fateor, post Hectora fractum  
 77 non bellum, sed praeda patent spectante triumpho.

QVAESTIO AT INQVIES : DOLOREM MEVM LENIAM, PERCVSSOREM PATROCLI CANIBVS ET VOLVCRIBVS SI DEDERO LANIANDVM.

78 Hectoreum si forte canes laniare cadaver  
 79 ipse paras crimenque putas, hoc Medus honestum  
 80 credit et ad Persas honor est, si membra volucres  
 81 eripiant. Et nulla detur licet ossibus urna,  
 82 multis membra tamen condentur rapta sepulchris :  
 83 corpus flamma cremans absumit, membra vorantes  
 84 hoc canis hoc volucres faciunt ; vix ossa relinquunt  
 85 et rogos ossa rapit. Forsan servabitur Hector,  
 86 ut madefacta cadant siccantibus ossa medullis  
 87 et longa sub tabe fluant ? Hoc cuncta sepulchra  
 88 exercent ; tamen intererit quod clausa tenebris  
 89 putrescant tumulis, at hic sub luce madescant  
 90 aspectusque tuos funestent ossa diurnis  
 91 visibus. Andromache tumulum sibi formet inanem  
 92 et causam lacrimis faciet quam denegat hostis :  
 93 te tamen, Iliacae populator gentis, Achillem  
 94 sacrilegi jam poena manet, qui viva peremptis  
 95 funestas elementa viris. Corrumpitur aer  
 96 mortibus, unde caret laesus vitalibus auris ;  
 97 non purus sub sole dies, non sidera noctis  
 98 impolluta micant, fuscantur cornua lunae,  
 99 sordibus et totum caeli nox inficit orbem.  
 100 Non Phoebus Danais morbos, non Troja Pelasgis  
 101 inferet aut natara repetens per castra sacerdos  
 102 Chryses Apollineus : hinc sunt, hinc funera maesta  
 103 fortibus et bellum geritur cum Morte cruenta.  
 104 Hector in hoste fuit saevus, cum vita maneret ;  
 105 plus post fata nocet. Certe medicabilis ille  
 106 te Chiron docuit pestes sanare jacentum,  
 107 cum chordas quateret plectro, cum bella manerent,  
 108 et citharam post lora daret, cum mentis onustae

109 post Centaurorum raptas de flumine praedas  
 110 ingentes animos puerili in corde levaret ;  
 111 non docuit quia maestus odor, quia putre cadaver  
 112 aera tellurem ventos animasque gravabit ?  
 113 Inde homines volucres pecudes et cuncta necantur,  
 114 corpora vivorum pariter mundique salutem  
 115 mors neglecta nocet : non sunt commercia juncta  
 116 mortibus et superis, divisit limite mundos  
 117 imposito natura parens ; non congruit aether  
 118 funeribus nec funus amat sub sole jacere,  
 119 inferni secreta dei sub nocte petuntur.  
 120 Non tibi per somnos aderit censoris imago,  
 121 Aeacus in medias veniens ad castra tenebras  
 122 voce manumque furens et te culpabit amare  
 123 asper et increpitans ? Et justa voce notabit :  
 124 "Tene, deum soboles, caeli pelagique nepotem,  
 125 atque Erebi gens clara mei, te, fortis Achilles,  
 126 ista decent ? Tumuli caesis et busta negentur ?  
 127 Nec dabis occisos juvenes Acheronta natate,  
 128 prostratis dum busta negas mortesque sepulchris  
 129 abdicas ? Me vita pia promovit ad urnam,  
 130 humani generis laudes et crimina quaeram ;  
 131 nec tamen hinc securus eris, quia noster ad urnam  
 132 advenies quandoque nepos : ignoscere manes  
 133 ignorant mecumque Minos vel Gnosius illic  
 134 iudicium Rhadamanthus habet commune barathri.  
 135 Nominis invidiam vestri per flumina manes  
 136 exagitant, sua jura neges quod morte peremptis,  
 137 Patroclumque tenent, quem nec conscendere cymbam  
 138 permittunt, nisi primus aquas transcenderit Hector.  
 139 Et nullum pars nostra sinit transire per undas  
 140 ac sortem retinere suam, nisi rite sepultum. "

## EPILOGVS

141 Desine, bellipotens, animos retinere feroces,  
 142 dux, iram depone, precor : non sentiet Hector,  
 143 quicquid in hoste furis, lacerum tenuisse cadaver ;  
 144 supplicium non Hector habet, sed poena Pelasgum  
 145 servatur per castra tuis, dum funera punis.  
 146 Aeacus invidiam, carus tormenta Patroclus  
 147 sustinet et vestri poenas luit ille doloris.  
 148 Vel medium Priamo, generose, refunde cadaver,  
 149 nam partem tractura tenet. Si reddere corpus  
 150 et laceros artus tempta pietate negabis,  
 151 exiet Andromache socero comitante per agros  
 152 Astyanacta trahens, qua tristior orbita monstrat,  
 153 et leget infelix dispersi membra mariti,  
 154 vepribus e mediis rupem complexa cruentam  
 155 oscula fixa dabit dicens de rupe maritum ;  
 156 in qua sanguis erit, rupem vocat Hectorsa conjux  
 157 et puerum miseranda docet, ne calcet harenas,  
 158 infecit quas forte cruor. Tardumque per horas  
 159 expectat socerum, sed non vacat : exprimit herbas,  
 160 quas rubuisse videt ; hoc nati vultibus addit,  
 161 ut patrera ferat ore puer ; suadente dolore  
 162 ipsa sibi demens extorquet, ut Hectorsa credat  
 163 Astyanacta suum. Priamo tamen Hectoris ossa,  
 164 si qua jacent dispersa rotis, ostendet et ambo

165 carnibus Hectoreis defigent oscula flentes.  
166 Ore cruentato puerum simul ambo monebunt  
167 oscula det membris ; "laceros ubicunque jacere ",  
168 dicet avus puero, " pater est quos videris artus ".  
169 Moribus his si nulla venit pietatis imago,  
170 aspice quid faciant conjux pater Hecuba natus  
171 et pudibunda soror : Priamus jacet oscula plantis  
172 rex senior dans ipse tuis nec turpe putabat,  
173 quod miserum fortuna jubet ; hinc virgo pudica  
174 Astyanacta tenens parvum super Hectora ponit  
175 et puerum deflere docet, sed parvulus optat  
176 ire nec extincti cognoscit funera patris.  
177 Heu lacerum nam corpus erat, quod mater et uxor  
178 complexae per colla tenent et vulnera ferri  
179 per laceros artus generoso in corpore quaerunt.  
180 Sed quid dorsa viri palpant ? Injuria constat  
181 magnanimi juvenis ; plagam, qua concidit Hector,  
182 et vulnus si nosse placet, versate supinum  
183 corpus et occisi tractentur pectora regis :  
184 invenient ungues, quanto descendit hiatu  
185 hasta potens quantumque dedit Vulcanius ensis.  
186 Nam quod terga ferunt, hoc currus fecit Achillis,  
187 dum trahit extincti juvenis per saxa cadaver  
188 et domino jam damna parant de funere tracto.  
189 Hectora mirantes plus te laudamus, Achilles,  
190 a quo victus obit : finem da, magne, dolori  
191 et post vindictam veniam concede perempto,  
192 qui poenas in luce dedit. Jam respice mitis :  
193 Astyanacta vides, Pyrrhi succedat imago  
194 ante oculos dilecta tibi, Priamique senectus  
195 mentibus asciscat venerandi vota parentis.  
196 Nam genitor Peleus laetum post bella videre  
197 te cupit ; et senior Lycomedes, conjugis auctor,  
198 exoptat reduci gaudens offerre nepotem.  
199 Planctibus Andromaches ceu praesens blanda putetur  
200 Deidamia simul, quae sollers nocte dieque  
201 mente oculis attentata volat ; nam fluctibus atris  
202 carbasa prima videns amens occurrit in undis  
203 perquirens, si Troja ruit, si concidit Hector,  
204 sollicita quem mente timet ; te plectra tenentem  
205 atque iterum blandas juvenili pollice chordas  
206 tangentem laudare cupit et bracchia collo  
207 nectere mellifluis adjungens oscula labris.  
208 Hecuba maesta gemens et canos pulvere foedans -  
209 omine non tali matrem praesentet ab undis  
210 corde tuo pietas : licet haec mortalia fata  
211 in se nulla timet, tamen haec te, fortis Achilles,  
212 mortalem genuisse dolet. Haec, summe, retracta  
213 et veniam largire pius. Si parva putantur,  
214 fac pretium, victor, generosum vende cadaver.  
215 Vendatur ceu vivus adhuc nec munere parvo,  
216 sed veniat tantum quantum pensabitur Hector.  
217 Hoc placet ut fortis habeatur iudice bello  
218 mors pretiosa viri : cunctos hortaris in hostem,  
219 si non vilis erit veniens occasus in armis,  
220 qui se despiciens cives dilexit et urbem.  
221 Dardanides dependat opes, det magna talenta :  
222 Astyanax egeat, Priamus mendicet et omnes,

223 infelix quos Troja capit. Haec poena manebit  
 224 Laomedontiadas, si carior ille sodalis  
 225 sollers Hectoreo condetur dignius auro,  
 226 dum tamen infernis requies detur et bona vivis  
 227 praestetur de morte salus ac pace fruuntur  
 228 aeris innocui caelum mare Tartara tellus,  
 229 unde genus ducis ; morti licet illa sepulchrum  
 230 comparet, omen erit, si reddat Troja tributum,  
 231 Troja vel Danais vectigal funera praestent.

MEDEA

R10 v.1 Fert animus vulgare nefas et virginis atrae  
 2 captivos monstrare deos, elementa clientes,  
 3 naturam servire reae, servire puellae,  
 4 astra poli et Phoebi cursus et sidera caeli  
 5 arbitrio mulieris agi, pendere Tonantem,  
 6 quod jubeat Medea nefas, ubi mittere flammis  
 7 imperet aethereas. Penetrat vox illa per auras,  
 8 cum vitas mortesque facit, cum fata retorquet  
 9 ad cursus quoscunque velit. Licet hospite caeso  
 10 serviat et Scythicae currat per templa Dianae,  
 11 possidet astrigerum funesto pectore caelum  
 12 et superos impune premit prece nixa virago  
 13 invitos parere sibi. Quae carmina linguis  
 14 murmuret aut urens species quae nomina dicat,  
 15 haec vatem nescire decet ; quae nosse profanum est,  
 16 quod fuerit vulgasse nefas. Nos illa canemus,  
 17 quae solet in lepido Polyhymnia docta theatro  
 18 muta loqui, cum nauta venit, cum captus amatur  
 19 inter vincla jacens mox regnaturus Iason ;  
 20 vel quod grande boans longis sublata cothurnis  
 21 pallida Melpomene, tragicis cum surgit iambis,  
 22 quando cruentatam fecit de matre novercam  
 23 mixtus amore furor dotata paelice flammis,  
 24 squamea viperei subdentes colla dracones  
 25 cum rapuere rotis post funera tanta nocentem.  
 26 Te modo, Calliope, poscunt optantque sorores :  
 27 dulcior ut venias (nec te decet ire rogatam)  
 28 ad sua castra petunt. Lauro succincta poetae  
 29 Pegaseo de fonte veni, quo rore medullas  
 30 et sensus infunde meos. Cur hospes amatur,  
 31 qui mactandus erat, vel cur mactatur amatus ?  
 32 Dives apud Colchos Phrixiei velleris aurum,  
 33 pellis erat, servata diu custode dracone.  
 34 Hanc propter pelagi temerator primus Iason  
 35 venerat, ut rutilas subduceret arbore lanas.  
 36 Ut Scytha conspexit Graiam de litore puppirn  
 37 ire per undosum proscissis fluctibus aequor,  
 38 expavit, nam monstra putat : quis crederet unquam  
 39 per freta, per rabidas hominem transire procellas ?  
 40 Barbarus ignaro regi jam nuntius ibat,  
 41 quae nova perferret pelagus ; sed callidus heros  
 42 solus Iason adhuc vento currente carina  
 43 prosilit in fluctus et litora visa natatu  
 44 nudatus ceu nauta petit. Sed Colchus alumnus,  
 45 nuntius ille redit secum comitante juvena,



46 ut nosset quid puppis erat, quid vela, quid arbor.  
 47 Membra viri mox nuda vident fugientis ad undas ;  
 48 quem sequitur directa manus capiuntque paventem  
 49 et manibus post terga ligant. Tunc Juno Cytherem,  
 50 ut vidit juvenem Scythicas artasse catenas  
 51 et pavidos fugisse simul cum puppe sodales,  
 52 alloquitur : " Lasciva Venus, jucunda modesta  
 53 blanda potens mitis, fecunda venustas amoris,  
 54 pulchra voluptatum genitrix et numen amantum,  
 55 te divum regina precor, matrona Tonantis :  
 56 est nimis acceptus juvenis mihi pulcher Iason,  
 57 qui gelidum quondam mecum tranaverat Istrum  
 58 et nunc infelix trahitur captivus ad aulam  
 59 Aeetis immitis forsitan mactandus ad aras.  
 60 Eripe captivum, retinent quem mille catenae,  
 61 mitte pharetratum puerum, mea Cypris, Amorem,  
 62 igne tuo flammata cadat furibunda virago,  
 63 discat amare furor, tandem sit blanda sacerdos,  
 64 templa pharetratae contemnat virgo Dianae,  
 65 despiciat delubra deae. Licet immemor extet  
 66 religionis amor timeant nec fulmen amantes,  
 67 te solam putet esse deam, te numen adoret,  
 68 te metuat metuenda deis, te judicet unam,  
 69 quam mare quam tellus quam numina cuncta fatentur  
 70 imperio subjecta tuo per templa per aras,  
 71 esse voluptatum dominam. Quod corda parentis  
 72 flectis et exutum telo candente Tonantem  
 73 despiciat me saepe jubes nec castus Olympum  
 74 destituat, sit ut imber olor, bacchetur adulter  
 75 vel quodcunque meum placuit mutare maritum -  
 76 non queror. Aesonidem tantum peto filia regis  
 77 nunc amet et laudet ; mox hunc suspiret anhelet,  
 78 quem mactare parat ; solvat cervice catenas  
 79 torpescens armata manus, cui bracchia collum  
 80 circumdent mucroque cadat jejunos ad aras. "  
 81 Finierat matrona Jovis. Sic orsa Dione :  
 82 "Me Venerem me, Juno, decet me, blanda noverca,  
 83 imperio parere tuo. Quid plura loquemur ?  
 84 Oderunt mea castra moras. " Sic fata Cythere  
 85 quaerit amoriferum per tota rosaria natum :  
 86 ille deas ponti telo flammabat in undis  
 87 maternis summissus aquis. Hymenaeus ad illum  
 88 mittitur. Huic fluctus produnt fumantibus undis.  
 89 Ut pelagus caluisse videt, " Hic aliger ", inquit,  
 90 " hic latet Idalius. Sed non latet, aequora fervent :  
 91 agnosco stridere fretum, ceu Phoebus anhelos  
 92 oceano demergit equos, cum nocte propinqua  
 93 luna venit stellante polo pendentibus astris.  
 94 Huc ades, o lascive puer, te mater ubique  
 95 quaerit et e cunctis vestrum me misit alumnum,  
 96 ut venias parcente mora. " Sic fatus. At ille  
 97 fluctibus e mediis surgens rutilante capillo  
 98 excussit per inane caput, quatit impiger alas,  
 99 ut pinnas desiccet aquis : micat ignis ut astra  
 100 plausibus excussus pueri, per cuncta videres  
 101 scintillare diem, volitant super aequora flammae.  
 102 Sic, ubi puniceos rutilans Aurora capillos  
 103 pectinat ante diem, quae mox perfundat Eoum,

104 phoenix, sola genus, senio lassata vetusto,  
105 cmnama cui folium nardum tus balsama amomum  
106 informant post saecula pyram reditura, sepulchrum  
107 conscendit factura rogos et verberat alas  
108 ut flammasciscat avis (sic nascitur ignis  
109 ante alitem ambrosios jam consumpturus odores) :  
110 sic puer Idalius spargebat plausibus ignes ;  
111 piscis aves armenta pecus fera pastor anhelant  
112 flammigero surgente deo. Volat inde per altum.  
113 Jam volucer non udus erat : quocunque propinquat  
114 aut ubicunque fuit, blando fervore vaporat,  
115 quem sequitur vernalis odor ; via pulchra rosarum  
116 tenditur et violas pallentes candida peplo  
117 lilia distingunt ac florea semita crescit :  
118 persulcans per inane polos micat orbita florum.  
119 Cypris odoriferos sensit fraglare volatus :  
120 " Natus adest", inquit ; " multis jam spargitur aer  
121 floribus, ambrosio totum respirat odore. "  
122 Dum loquitur lasciva Venus, venit ecce Cupido  
123 fessulus et gremio matris libratur anhelans,  
124 quo sessurus erat. Quem protinus illa volentem  
125 occupat et crines componit mater Amori  
126 ac puerum complexa fovet dans oscula nato.  
127 Sic blandita jubet : " Pyrois, mens ignea mundi  
128 atque vapor fecunde poli, successio rerum,  
129 affectus natura genus fons auctor origo,  
130 tu vitae fecunda salus, tu blanda voluptas,  
131 tu princeps pietatis, Amor, te praeduce mundo  
132 alternant elementa vices et non perit orbis,  
133 cum pereant quaecumque creat, nec sentit ademptum  
134 successu redeunte novo. Venit ecce noverca,  
135 in manibus jam Juno meis supplexque precatur  
136 quae fuerant optanda tibi : Medea sacerdos,  
137 sacrilega quae voce solet compellere caelum,  
138 invitos accire deos, urgere Tonantem,  
139 dum precibus elementa quatit mare sidera terras,  
140 naturam turbare simul, tua tela medullis  
141 excipiat (hoc Juno petit) juvenemque Pelasgum  
142 diligat optet amet cupiat suspiret anhelet.  
143 Sollicitus tamen ista para cautusque memento :  
144 Medeam fixurus eris. " Sic fata Dione.  
145 Risit Amor matrisque sinu se subtrahit ales ;  
146 spicula saeva legit, quibus olim Luna per umbras  
147 pastorem flammata tenet nec sustinet ignes  
148 Luna Cupidinos, Solis quae sustinet orbem  
149 et fratris radiis conceptus lucis adoptat.  
150 " Hoc ", ait ignipotens, " telo Medea cremetur,  
151 quo Scythicam succendit Amor, dominaeque favillas  
152 excutiam per templa volans, et virgo cruenta  
153 approbet hos arcus dominae plus posse pharetris.  
154 Namque Diana feras, cervos et figere dammas  
155 assolet : hoc telum reges et numina figit. "  
156 Quattuor interea niveas astare columbas  
157 Cypris amoena jubet : roseis frenantur habenis,  
158 candida puniceis subduntur colla rosetis  
159 (nam juga sunt compacta rosis), fert dextra flagellum  
160 purpura quod mollis, tenuis quod sericus ornat.  
161 Jam volucer conscendit aves et blanda Voluptas

162 it comes, Amplexus veniunt, Hymenaeus adhaeret,  
163 Gaudia concurrunt, Risus atque Oscula pergunt.  
164 Nam licet Idalias sociarint frena columbas  
165 et junctae per cuncta volent, tamen impiger ales  
166 nunc hanc nunc illam residet gaudetque jugales  
167 jam relevare suas et se pensare volatu  
168 (sublatum propriis persentit in aera pinnis  
169 aurigam quadriga volans) iterumque columbas  
170 appetit et pharetris concludit dorsa volantum.  
171 Nondum per Scythicas glacies stat barbara Colchis,  
172 et jam bruma rigens Arctoi tristior axis  
173 torpebatque coacta gelu, sed pinniger audax,  
174 et magis accessu pueri plaga maesta serenat  
175 adventum testata dei : mox taetra fugantur  
176 nubila, caeruleos excludit flammiger imbres.  
177 Impia jam Colchis, jam saevior ara Dianae  
178 coeperat ostendi : jam tunc mandante tyranno  
179 ecce trahebatur ceu taurus pulcher Iason,  
180 quem sequitur Medea nocens urgetque ministros  
181 nudato mucrone furens. Delubra subibant  
182 jamque propinquabant aris. Sed numen amantum  
183 furtim templa petit : sonuerunt tela pharetris.  
184 Exultat gavisus nimis Medea sacerdos :  
185 telorum strepitum castae putat arma Dianae  
186 increpuisse tholo, credit sua vota sacerdos  
187 ante preces audisse deam. Mox numen adorans  
188 " Omen adest ", inquit, " Triviam te, Luna Diana,  
189 confiteor perstans, heres Proserpina mundi ;  
190 nam tria regna tenes : tu caelo Cynthia regnas,  
191 venatrix terrena micas, capis atria Ditis,  
192 tempora distribuens regnis et cursibus apta :  
193 jam grates audita loquor. Jacet hostia templis  
194 per fluctus advecta tuis. " Sic fata per aras  
195 virgo cruenta molam perfert. At mystica nutrix  
196 fessa licet tremibunda gemat, tamen ipsa jacentem  
197 tendere colla jubet vel pectora prona supinet.  
198 Ergo peregrinus cum jam versatur Iason,  
199 forte oculos per tecta levat : videt ecce volantem  
200 atque salutantem puerum. Sed nauta precatur  
201 murmure sollicito : " Numen quod mundus adorat,  
202 si caelum, si terra tui sunt, alme, triumphum  
203 vel quicquid natura creat, si sanguinis expers  
204 mortis et infaustae es et sunt tamen hostia flores  
205 matris et insertae pendent per templa coronae  
206 sanguine virginei tantum contenta pudoris :  
207 eripe me his, invicte, malis. Ego victima servor,  
208 atque utinam servor, jaceo feriendus in aris. "  
209 Audiit ignipotens (hominum nam murmura sentit)  
210 et ridens gavisus ait : " Pirata decore,  
211 quid metuis, quem fata manent, cum vita superstes  
212 restat adhuc, cum regna petunt, pellis arietis  
213 imminet et conjux dabitur Medea sacerdos ?  
214 Sed memor esto mei, ne te fortuna superbum  
215 reddat et incipias iterum ceu nauta venire. "  
216 Dum loquitur pinnatus Amor, jam virgo levabat  
217 dstricto mucrone manum. Captivus Iason  
218 exclamat : " Succurre Venus, succurre Cupido :  
219 jam ferior, Medea ferit. " Sic fatus. At ille

220 ignea sidereo componit spicula nervo,  
 221 misit harundineum per flammea cornua ferrum,  
 222 stridula tela volant : rapiunt praecordia flammas,  
 223 corda calent oculique labant, suspiria rumpunt,  
 224 marcida funereum laxavit dextera ferrum.  
 225 Sed nutrix mirata moras, " Dic, virgo, quid haeres ? "  
 226 Increpat, " ecce feri. Fibrae rapiantur et exta,  
 227 consultum det fata jecur. Medea moraris ?  
 228 Occidimus : torpescit iners antistita Phoebes  
 229 permixto pallore rubens, non lumina vibrat,  
 230 non furit aut tremuli strident in murmure dentes.  
 231 Cur homicida vacas et stas rea ? Sed rea non es,  
 232 si fueris homicida magis. Cur explicat artus  
 233 aut tangit cur saepe caput, quid spirat hiatus  
 234 oris et ad zonam digiti mittuntur inermes ?  
 235 An magus est pirata jacens et sacra Dianae  
 236 murmure sollicito prohibet solvitque profanus ? "  
 237 Dixerat et gladium dextrae revocabat inertis  
 238 impia turpis anus. Rursus conclamat Iason :  
 239 " Victima sum, pereo : jugalis male mucro minatur. "  
 240 Pinnatus surrisit Amor rursusque sagittas  
 241 jecit et ardentis nutantia corda fatigat.  
 242 Aestuat interea sacris repetita sacerdos  
 243 ignibus. Effatur : " Non est haec victima digna :  
 244 non torta cervice jacet, male palpitat, artus  
 245 erigit impatiens et saucius ante dolorem :  
 246 sanguine membra carent. Jam non erit hostia grata,  
 247 quae sicco mucrone cadet. " Conversa sacerdos  
 248 ad juvenem : " Dic, nauta fugax, pirata nefande :  
 249 est consors matrona decens an caelibe vita  
 250 degis adhuc nullumque domi tibi pignus habetur ? "  
 251 " Solus ", ait captivus, " ego, mihi pignora nulla  
 252 conjugis aut sobolis. " Dictis gavisus virago  
 253 blanda refert : " Vis ergo meus nunc esse maritus ? "  
 254 " Servus ", Iason ait, " tantum ne vita negetur  
 255 te precor et dominam fateor. " Sic fatus. At illa  
 256 rumpit vincla humeri, virgo suspendit ab aris  
 257 ut facinus purget proprium ; vocat ipsa maritum  
 258 vestibus indutum Tyriis, quas sericus ambit  
 259 mollis et in medio fulvum distinxerat aurum,  
 260 blattea puniceo radiabant stamina filo.  
 261 Expavit nutrix, omnes stupuere ministri.  
 262 At puer ignipotens victor per templa triumphat,  
 263 nudus ludit Hymen, mollis Lascivia saltat,  
 264 blanda Libido coit, simplex Affectus inhaeret,  
 265 ludicra puniceis resonabant Oscula labris,  
 266 dant faciles plausus Concordia Gratia Lusus :  
 267 sponsus Iason erat gaudens et sponsa sacerdos  
 268 ad thalamos post templa. Duci tunc pronuba Juno  
 269 affuit et grates Veneri facunda canebat.  
 270 Ecce triumphantes ingratis dura jugales  
 271 consequitur, gressus consors Oblivio jungit.  
 272 Marcidus interea domitis rediebat ab Indis  
 273 Liber, anhelantes residens post proelia tigres ;  
 274 quem sequitur jucunda manus saltare parata  
 275 ebria pampineis miscens vestigia thyrsis.  
 276 Sensit amoriferum Scythicam fuisse sagittis  
 277 et volucrem puerum populatum templa Dianae :

278 "Illo jam gressus ", dixit, " convertite tigres :  
 279 estis opus, mea turba, deo. Properate, ministri :  
 280 pinniger Idalius minor est sine munere nostro. "  
 281 Dixerat et Scythiam vacuus jam sponte petebat :  
 282 jam venit ad Colchos, jam se Semeleia jungunt  
 283 agmina, Bybliades saltant Bacchaeque rotantur.  
 284 Venatu interea rediens delubra petebat  
 285 plectriferi germana dei mirata repente  
 286 quod sileat templum, subito quod sparsus ubique  
 287 ambrosius sic fragret odor. Sonuere per aures  
 288 fescennina deae : " Pulchrorum vota geruntur,  
 289 jungitur Aesonidi fulgens Medea marito. "  
 290 Erubuit doluitque simul : " Non omine fausto  
 291 conjungatur ", ait, " nec prospera flammea sumat :  
 292 displiceat quandoque viro, cui turpiter audax  
 293 sacrilegus processit amor. Sed justius opto :  
 294 perfidus egregiam contemnat nauta jugalem,  
 295 dulcior affectus vel amara repudia mittat ;  
 296 funera tot videat fuerint quot pignora mater,  
 297 orba parens natos plangat, viduata marito  
 298 lugeat et sterilem ducat per saecula noctem ;  
 299 advena semper eat, se tanti causa doloris  
 300 auctorem confessa gemat". Sic fata Diana  
 301 tristis abit. Delubra tacent, sacraria maerent,  
 302 sanguine templa carent, nutrix tamen atria tantum  
 303 templorum servabat anus, haec anxia crimen  
 304 virginis et raptum deflebat maesta pudorem :  
 305 qualis in exhaustis per sordida tecta ruinis  
 306 strix nocturna sonat rostro stridente per umbras ;  
 307 qualis et horrendus funesto carmine bubo  
 308 conqueritur deflenda gemens, dum tristia maestus  
 309 funerea sub nocte canit, sic anxia nutrix  
 310 ingemit et tremulas diffundit maesta querelas.  
 311 Nuntius interea maesto volat ore satellites  
 312 ad regem subvectus equo natamque tyranno  
 313 indicat ignoto passim nupsisse marito.  
 314 Expavit genitor : sic quondam tristis Agenor  
 315 concidit Europae senior fraudatus amore,  
 316 cum nesciret adhuc generum meruisse Tonantem.  
 317 Ira dolor numen pietas injuria regnum  
 318 concutiunt franguntque virum, jubet arma ministris  
 319 expediant, nam fama ducem rapiebat in enses.  
 320 Cum poenas mortisque parat, venit Indus ad aulam  
 321 Liber et egregia compressit voce furentem :  
 322 " Sic tibi, rector ", ait, " mentem possedit inanis  
 323 religio ? Sic pignus amas ut tela parentur ?  
 324 Qui furis, expecta dulces de prole nepotes.  
 325 Virginitatis onus melior tolerare sacerdos  
 326 non potuit : fervescit amans et casta Diana  
 327 pastorem confessa virum. " Haec Liber aiebat.  
 328 Mulcentur jam corda ducis natamque tyrannus  
 329 purgat et extemplo Medae laudat amorem :  
 330 sic meruit veniam generum confessus Achilles,  
 331 sic pater ignovit Lycomedes, pectore natae  
 332 et Pyrrhum suscepit avus gremioque nepotem  
 333 fovit et ad Trojam post crimina misit Achillis.  
 334 Ut Scytha mollitus blanda pietate mitescit,  
 335 mox jubet ut generum vel pignus regis ad aulam

336 deposito terrore rogent. Tunc regia lauro  
 337 cingitur et postes soceri pia sarta coronant.  
 338 Mox thalamos subiere pares : laetatur Iason  
 339 sponsus et in castris Veneris Medea triumphat.  
 340 Quattuor interea Phoebus transegerat annos,  
 341 sed natos Medea duos fecunda marito  
 342 ediderat, cum nocte jacens suspirat Iason  
 343 nec gemitus latuere magam : " Quam, callide, fraudem  
 344 quodve nefas moliris ? " ait. " Non fallis amantem.  
 345 Dulcia saepe vigil contrectans pectora conjux  
 346 agnovi quia furta paras, quia mente fugaci  
 347 infaustum quodcunque cupis. Secreta polorum  
 348 cognosco, si morbus erit, si bella parentur,  
 349 si pluet aut flamma caelum rutilante coruscet :  
 350 et tu Medeam credis quia fallis, Iason ? "  
 351 Tunc sic Aesonides stimulet quae forma medullas  
 352 indicat et pellis causas vel tempore tanto  
 353 quod lateat socios, quia jam sic regnat amicus,  
 354 consumptum quem morte putant planguntque parentes :  
 355 " Optarem revidere meos iterumque reverti  
 356 ad thalamos, regina, tuos, monstrare Pelasgis  
 357 quid conjux, quid fata valent. " Medea marito :  
 358 "Jam pariter pergamus ", ait ; " sic aurea pellis  
 359 tollatur, lateant vastum ut mea facta draconem. "  
 360 Dixerat et stratis rapitur sub nocte silenti.  
 361 Astra vocans et signa ciens jubet illa Soporem  
 362 ad nemus ad pellem vel templum Martis abire.  
 363 Dormierat serpens : pellis subtracta marito  
 364 traditur, et pariter fugerunt fratre necato.  
 365 Accipiunt natos et singula pignora portant.  
 366 Ventum erat ad Thebas, pellis datur aurea regi.  
 367 Miratur rex ipse Creon, laudatur Iason  
 368 quod freta quod terras sic felix praedo vagetur.  
 369 Regis nata decens fuerat pulcherrima Glauce,  
 370 jam cui virginitas annis matura tumberat ;  
 371 haec ubi conspexit juvenem, flammata nitore  
 372 aestuat et laudans alieni membra mariti  
 373 optat habere virum. Sonuit genitoris ad aures.  
 374 Tunc rector Thebanus ait : " Si Juppiter auctor,  
 375 si Lachesis, si fata jubent, nil ipse morabor.  
 376 Progenies mea turpe cupit : Fortuna favorem  
 377 praestet et innumeri laudent per saecula nepotes.  
 378 Virgineo dabitur pellis cum dote pudori. "  
 379 Finierat senior. Votum cognovit Iason  
 380 et grates electus agit. Praecepta tyrannus  
 381 diffundit per regna nocens, invitat iniquus  
 382 ut veniant ad vota duces. Dum festa parantur,  
 383 cognovit Medea nefas nec tardius illud  
 384 credidit ; ingratum nam senserat ipsa maritum.  
 385 Ante diem tamen illa dolens, cum cerneret aulam  
 386 et regis fervere domum, cum magna parantur  
 387 prandia, venturi mittebant praemia reges,  
 388 signorum cursus et plenae cornua lunae  
 389 captabat Medea furens : jam clauserat orbem  
 390 Cynthia sidereis transcendens saltibus astra.  
 391 Mox Colchis se spargit aquis, et sulphure puro  
 392 cum taedis fumans, purgabat membra sacerdos  
 393 et campum secreta petens, ubi mille sepulchra,

394       astabat dejecta oculos, confessa reatum,  
395       et Lunam manibus tensis cum voce precatur :  
396       " Astrorum princeps, signorum gratia fulgens  
397       et caeli stellantis honos, caliginis hostis  
398       ac nocturnorum triplex regina polorum  
399       atque tenebrarum splendens patrona mearum,  
400       cui cancer domus est , ora clarissima mundi,  
401       bracchia contorquens stellis, quae mense peragras  
402       quod Phoebus radians toto vix explicat anno,  
403       corporis et dominam verax quam turba fatetur,  
404       tu nemorum custos, tu mors pinnata ferarum  
405       (ursus cervus aper pantherae damma leones,  
406       retia cum veniunt aut cum venabula vibrant,  
407       ante necem tua praeda jacent) ; te tertius heres  
408       participem regni, consortem juris amari  
409       optavit mundumque dedit tibi dona secundum  
410       (sub tua terribilis rapiuntur sceptra tyranni,  
411       dives pauper inops raptor pirata sacerdos  
412       advenient sub lege pari, non sorte sub una :  
413       tu punis post fata reos et viscera saevo,  
414       Persephone, das nostra cani), post regna barathri  
415       quae vultum mutare soles visura Tonantem :  
416       da veniam, Medea precor. Cum clade suorum  
417       non decet ira deos. Mereor pro crimine poenam,  
418       te feriente tamen, non ut mendicus Iason  
419       sit vindex, regina, tuus, qui criminis auctor  
420       ipse fuit : miseram solus non puniat, oro,  
421       qui mecum ferendus erat ; cuicumque jubebis,  
422       colla paro feriat, tantum ne virgo Creontis  
423       discidium pariat nautam ductura maritum.  
424       Exaudi famulam : dolor est, non zelus Iason.  
425       Quinque dabo inferias (sat erunt pro crimine nostro  
426       illustres animae) : niveam cum Jasone Glaucem,  
427       mortibus amborum regem superaddo Creonta  
428       et natos miseranda duos, mea pignora, supplex  
429       offerro, sacrilegos nostro de corpore fructus,  
430       ne prosit peccasse mihi. " Sic fata sacerdos  
431       suscepit non ire polos nec Luna videtur  
432       sic tauros urgere suos, sed cursibus astra  
433       ignitis responsa dabant. Gavisus sacerdos  
434       vertit ad infernum gemitus regemque barathri  
435       secura jam voce ciet Furiasque precatur :  
436       " Impie rex Erebi, qui formidabile regnum  
437       Mortis habes, quem terra premit, qui funera mundi  
438       excipis et tantis non explens luctibus aulam ;  
439       anguicomae vos quoque deae, quibus (impius horror !)  
440       Turpia viperae funduntur membra cerastae  
441       (plurimus ora tegit pendens de vertice serpens  
442       et sinuant orbes per pallida colla dracones) :  
443       si manibus laniata meis mala victima vestros  
444       ad manes pervenit homo, si viscera matris  
445       vos propter scindens homines in ventre necavi,  
446       nunc nostras audite preces. Regnator Averni,  
447       crastina cum Glauce veniet nuptura marito,  
448       mox Furias admitte tuas ; properate, sorores  
449       Tartareae : Thebis iterum jam vota geruntur,  
450       currite, per thalamos Iocastae frater et heres  
451       conjungit natam. Gens haec est vestra : dicavit

452 mortibus impietas, affectus funera praestant.  
 453 Cur mora ? Nam nihil est quod non me exaudiat unquam.  
 454 Virginitas si casta placet, retinere pudorem  
 455 si libet et nunquam contagia blanda mariti  
 456 quaeritis, innuptae nuptam exhorrete sorores.  
 457 Si Furias saevire precor nec sponte nocetis,  
 458 non estis Furiae : nomen mutate domosque,  
 459 ponite serpentes, alienas reddite flammam  
 460 et puerum Veneris, quem jam tempsistis, amate. "  
 461 Dixerat et terra spatium tremibunda ciebat :  
 462 quo steterat Medea loco, telluris hiatus  
 463 finditur. Attonitas inclinat cautior aures  
 464 et surgens : " Audimur ", ait, " nam terra tremescit,  
 465 verbera plaudentum resonant per inane sororum,  
 466 sibila vipereis vibrant sub dentibus angues.  
 467 Res melior tempusque monet redeatur ad urbem.  
 468 Ante tamen fluvio corpus mergatur et undis. "  
 469 Quod maga digrediens mox perficit et petit urbem.  
 470 Exilit interea tecturus Lucifer astra  
 471 puniceo praevectus equo rutilusque micansque  
 472 concusso de crine jubar diffundit in orbem  
 473 flammigeri roseas praecedens solis habenas ;  
 474 coeperat aula ducis strepitu resonare clientum.  
 475 Jam Phoebus scandebat equos et luce rubebat  
 476 post noctem ventura dies, jam tecta Creontis  
 477 regibus implentur, jam proxima virgo marito  
 478 sederat et tabulas calamo sulcabat Iason :  
 479 "Conventum pactumque ", sonat signatque tabellas  
 480 horrida Tartareo veniens de gurgite virgo  
 481 Tisiphone signumque premit gavisas Megaera,  
 482 Allecto testis ceras adamante notavit ;  
 483 anguibus horrendis per regia tecta flagellant.  
 484 Interea Medea novam formare coronam  
 485 coeperat et niveis miscebat sulphura ceris,  
 486 pix et stупpa ligat, species dat quattuor artis  
 487 mascula tura cremans, sterili suffire cypresso  
 488 cura fuit cyproque ligat, quod naufraga puppis  
 489 perdidit ; cristata manus sancire jubetur :  
 490 lambere caeruleis permisit sarta cerastis.  
 491 Exitiale repit mox praemia taetra venenum,  
 492 atque aurum mentita nocens radiare corona  
 493 creditur et gemmas flores imitantur iniqui.  
 494 Dum funus Medea parat haec munera Glaucae,  
 495 processit roseis sol mundum amplexus habenis.  
 496 At maga sulphuream ponens ad busta coronam  
 497 haec ait : "O mundi facies pulcherrima, Titan,  
 498 naturam fervore tenens, elementa coartans,  
 499 ne dispersa fluant aut mundi machina mergat,  
 500 stelligeri jubar omne poli, quem sphaera polorum  
 501 sustinet et prohibet rutilam plus ire per aethram,  
 502 dum contra rapis axe rotas et colligis ignes ;  
 503 ipse pias animas mittis et claudis in aevum  
 504 orbe tuo : miserere tuae, deus optime, nepti.  
 505 Insidant haec sarta comis et virginis ora  
 506 digna corona premat : sint, inquam, regis in aula  
 507 munera nostra rogi, dent praemia tanta sepulchrum,  
 508 ignea mors rapiat sponsum cum paelice busta. "  
 509 Sic effata minax Solis mox numen adorat.



510 " Tempus adest, pergamus ", ait. Sic fata coronam  
 511 tollit et insontem fingens ad tecta Creontis  
 512 venerat, oblata sponsae dat serta puellae :  
 513 " Accipe, virgo, libens auratam in fronte coronam,  
 514 quam captiva dabo, qualem mea pignora sumant. "  
 515 Dixerat et capiti, quod jam diademate regni  
 516 splendebat, fera serta locat. Laudata recedit  
 517 Colchis, et infaustas vomverunt munera flammis :  
 518 has radians nam Phoebus alit. Jam creverat ignis :  
 519 uritur ingratus usta cum virgine nauta ;  
 520 cum genero nataeque parat succurrere rector,  
 521 uritur ipse Creon ; rogos est mox aula tyranni.  
 522 Diffugiunt omnes, populi conviva ministri,  
 523 saltantum fugere chori, nam festa canentes  
 524 ambusti lamenta sonant nec tympana plausu  
 525 percutiunt, sed turba gemens hinc inde lacertos  
 526 verberat et flentes sed non sua funera plangunt.  
 527 Stabat sola nocens necdum satiata sacerdos  
 528 nec securata tamen : nunquam sic posse venena  
 529 credidit aut precibus tantum servire furores.  
 530 Sed postquam solos quos jusserat ignis adussit,  
 531 tunc natos furibunda premit. Nam Mermerus insons  
 532 et Pheretes matrem blanda pietate vocabant.  
 533 Ut flammis vitare queat, infantia simplex  
 534 affectu petit ipsa necem vel sponte pericla  
 535 quaerit inops, passura necem mucrone parentis,  
 536 ignari, quae mater erat quid saeva pararet.  
 537 Tunc genitrix furibunda manum suspendit et ense  
 538 ac fatur : " Sol testis avus Sol Persice Mithra,  
 539 Luna, decus noctis, Furiae, Proserpina, Pluton :  
 540 accipe, Sol radians, animas, tu corpora, Luna,  
 541 nutrimenta animae ; fundit quem mucro cruorem  
 542 sumite vos, Furiae ; noctis rex exigat umbras ;  
 543 spiritus in ventos [lacune]  
 544 [lacune] satis est punisse nocentes  
 545 insontesque simul. Miseros hoc ense necabo,  
 546 quo genitor feriendus erat : nihil ipsa dolebo,  
 547 si ingrata maneat nullus de gente superstes. "  
 548 Haec ait et geminos uno simul ense noverca  
 549 transegit pueros. Quos sic portabat ad arcem  
 550 (ut proceres videre nefas, timere cruentam  
 551 et doluere simul), ceu quondam baccha Lyaei  
 552 saeva caput juvenis mater gestabat Agave.  
 553 " His ", inquit Medea, " rogis, ubi pulchra noverca  
 554 et pater ipse Creon vel perfidus arsit Iason,  
 555 vos, miseri, commendo, meis. " Sic fata minorum  
 556 corpora saeva parens funestos mittit in ignes  
 557 et currus metuenda petit. Venere dracones  
 558 viperea cervice jubas et colla levantes  
 559 squamea, cristato radiabant vertice flammae.  
 560 Currus taeda fuit, sulphur juga, temo bitumen  
 561 et rota cupressus, solidarat frena venenum,  
 562 plumbeus axis erat raptus de quinque sepulchris.  
 563 Occupat illa gravem funesto corpore currum,  
 564 ire furor residens taetros simul imperat angues.  
 565 Tolluntur celeres, mox se tellure levabant,  
 566 jam nutant per inane rotae hinc inde labantes,  
 567 aera saeva petit volitans quadriga venena

568 et poterat fuscare diem, corrumpere ventos,  
569 ni Phoebus rubuisset avus de crimine neptis  
570 et totum meliore coma perfunderet orbem.  
571 Saeve Furor, crudele Nefas, infausta Libido,  
572 Impietas, Furiae, Luctus, Mors, Funera, Livor,  
573 Imquitate mortales miseroque ignoscite mundo,  
574 parcite jam Thebis, diros cohibete furores.  
575 Inde venit quodcunque nefas : sic Cadmus aratro  
576 obruit infaustis crudelia semina sulcis,  
577 inde seges ferrafa micat vel Martis anhelii  
578 heu male conceptis praegnatur terra venenis ;  
579 emicuit galeata cohors aciesque nefanda,  
580 rumperet ensiferis cum ferrea messis aristis,  
581 insurgunt clipeis, rapiunt simul arma phalanges  
582 mortibus alternis et mutua fata minantur  
583 fraternumque nefas qui gessit vindicat ensis ;  
584 inde Athamas miserandus erat, miser inde Palaemon,  
585 inde Iocasta fuit, turpis fuit Oedipus inde,  
586 inde Eteocles erat frater Polynicis et hostis,  
587 et Polynices inops germani morte peremptus.  
588 Blanda Venus, lascive puer, Semeleie Bacche,  
589 parcite vos saltim Thebis quibus auctor origo  
590 aut soboles praeclara fuit : tibi mater, Iacche,  
591 Thebana de stirpe et, arator, tibi Diones  
592 Harmoniam nupsisse ferunt : pro munere Thebae  
593 et pro tot meritis sic funera tanta merentur ?  
594 Crimen erit genuisse deos ! Jam Creta Tonantem  
595 depositum nutrisse neget, jam Delos in undas  
596 fluctuet et paveat partus meruisse deorum,  
597 te Venerem freta vestra negent, abjuret Amores  
598 Cyprus et Idalium pigeat coluisse Dionem,  
599 Vulcanus Lemno, Juno spernatur ab Argis,  
600 Gorgone terribilis Pallas damnetur Athenis,  
601 sitque nefas coluisse deos, quia crimen habetur  
602 religionis honos, cum dat pro laude pericla.